

經禮補逸序

自樂亡而經行于世惟五易詩書春秋雖中不無殘闕而未若禮經甚焉然三百三千不傳蓋十之八九矣朱子嘗攷定四經謂三禮體大未易緒正晚年倦：是書未就而沒遂為萬世缺典克寬伏讀而加惋惜焉世之三禮所傳曰周禮曰儀禮曰禮記其實禮記乃儀禮之傳儀禮乃周禮之節文而三禮之要則在乎吉凶軍兵嘉五禮之別也何則吉禮之別十有二以禋祀昊天上帝以寔柴祀日月星辰以禋燎祀司中司命飗師兩師以血祭：社稷五祀五嶽以豕沈祭山林川澤以醵辜祭四方百物以肆獻裸享先王以饋食饗先王以祠春饗先王以禴夏

饗先王以嘗秋饗先王以烝冬饗先王凶禮之別有五以喪禮  
哀死以荒禮哀凶以弔禮哀禭哉以禭禮哀圍敗以恤禮  
哀寇亂賓禮之別有八春見曰朝夏見曰宗秋見曰覲冬見曰  
遇時見曰會殷見曰同時聘曰問殷頌曰視軍禮之別有五以  
大師之禮用衆以大均之禮恤衆以大田之禮簡衆以大役之  
禮任衆以大封之禮合衆嘉禮之別有六以飲食之禮親宗族  
兄弟以昏冠之禮親成男女以賓射之禮親故舊朋友以饗燕  
之禮親四方之賓客以賑膳之禮親兄弟之國以賀慶之禮親  
四方之賓客此其大較也然儀禮十有七篇吉禮之存惟特牲  
饋食篇乃諸侯國之士祭祖廟之禮少牢饋食及有司徹篇乃  
諸侯鄉大夫祭祖禰廟之禮凶禮之存唯喪服篇乃制尊卑親  
疎冠經衣服之禮士喪禮篇乃士喪其親自始死至既殯之禮  
士虞禮篇乃士既葬其親迎精而反日中而祭于殯宮之禮賓  
禮之存惟士相見禮篇乃士以職位相親始承贄相見之禮聘  
禮篇乃諸侯相交久無事使相問之禮覲禮篇乃諸侯秋朝天  
子之禮嘉禮之存唯冠禮篇乃士之子始加冠之禮士昏禮篇  
乃士娶妻之禮鄉飲酒禮乃鄉大夫賓興賢能飲酒之禮鄉射  
禮篇乃士為州長會民射于州序之禮燕禮篇乃諸侯燕饗其  
其臣之禮大射儀篇乃諸侯將有祭祀之事與郡臣燕飲之禮  
公食大夫禮篇乃諸侯以禮食鄰國小聘大夫之禮自此之外

如朝覲會同郊祝大饗帝大喪之禮皆亡逸况軍禮無存非闕  
細故此豈散逸已在于夫子正禮之前哉是以當時吉禮之失  
如魯君之郊僭天子之禮孟獻子之禘七月而為之夏父弗綦  
躋僖公而逆祀三桓大夫立公廟于私家管仲鏤簋朱紘晏平  
仲豚肩不掩豆至于大廟說笏與燔柴于與諸侯宮縣而祭以  
白牡之類是也凶禮之失如伯魚喪出母期而猶哭子路姊喪  
過而弗除子上母死而不喪成人兄死不為衰有為慈母練冠  
為妾齊衰者有居喪沐浴佩玉與浴于鬯室者有朝祥而暮歌  
與既祥而絲屨組纓者以至小歛而奠于西方既祖而反柩受  
弔有以大夫而遣車一乘有葬其夫人而醯醢百甕之類是也

賓禮之失如天子下堂而見諸侯諸侯朝覲而私覲主國王臣  
以私好而朝諸侯者有焉諸侯以强大而盟天子之三公者有  
焉庭燎之百侯國用之繡黼丹朱中衣大夫用之者又有焉嘉  
禮之失如魯昭公娶于吳而不告天子魯哀公為重使夏以饗  
賓天子以喪賓燕者有之夫人出境而饗諸侯者有之大夫反  
坫與不識殺烝者又有之軍禮之失如齊桓公亟舉兵作偽主  
以行魯莊公及宋戰以失御而敗戰而復矢始于升陘敗而鬻  
矛始于臺鮑以至蒐田不時丘甲始作之類可致也又况出師  
專征習視故常爭地躡武歲無虛日使禮經舊典具存于當時  
則五禮之失豈至如是之甚哉由是知周之叔世禮典已多散

逸蓋不特火于秦而亡于漢也今攷于儀禮周官大小戴記易詩書春秋傳孝經家語及漢儒記錄凡有合于禮者各著其目列為五禮之篇名曰經禮補逸是編也于周公經世之典雖未能極意象之微然五禮之大體蓋略包舉無遺庶幾學者于此俾由得失以觀其會通而天之所秩與造化之運不容息者卒歸于性命之正則三代可復也明時制作之盛或有擇焉亦區區愛禮之心一得云後學新安汪克寬序

先生諱克寬字德輔一字仲裕姓汪氏世居祁門流野自我文公朱子一傳為勉齋黃氏再傳為雙峰饒氏三傳為東山汪氏東山即先生仲大父而先生實嗣其傳元泰定中舉于鄉已而棄去畢志聖賢之學當

高廟初召至京師與修元史為儒生首書成不願仕

賜金幣遣歸而終學者號環谷先生此其大志也先生著述有易傳義音考詩集傳音義會通春秋傳纂疏提要左傳分紀經禮補逸周禮類要四書音證綱目考異諸書惟纂疏傳學者餘多散失不存走竊悼之而力不足以復之也先生玄孫文林文彙暨五世從孫仁政仁禮奉先生遺像及殘編數

種見示且請一言末學謏陋豈足以與知先生之萬一哉維  
桑之敬高山之仰則有不能已者謹為之贊：曰此  
考亭世適門生第四人也此

龍興史局布衣第一人也六經皆有說而春秋猶盛平生皆可  
師而出處尤正其道足以覺人其功足以衛

聖遺像凜然百世起敬

弘治六年歲次癸丑上元日

賜進士及第中順大夫詹事府少詹事兼翰林院侍講學士同  
修

國史 經筵官同郡後學程 敏政 拜書

### 經禮補逸序

六籍之闕也久矣而禮為甚漢興區之擬拾于秦火之餘而淹  
中古經旋復散失所存者十有七篇而已周官雖後出而司空  
之篇竟莫得補：戴所傳又往：雜以秦漢之記然則學者之  
欲覩夫成周三千三百之日之全固亦難矣宜乎其學之寥：  
而莫講也雖以韓子之賢尚苦難讀而謂于今誠無所用矧他  
人哉至宋慶曆元祐諸儒先後慨然有志于復古及朱子乃始  
斷然謂周禮為禮之綱儀禮其本經而禮記其義疏于是創為  
條目科分臚列出入經傳補其遺闕以為王朝邦國家鄉學禮  
而喪祭二禮則以屬門人黃氏其有功于學者甚大然其書浩

博窮鄉晚進有未易以究遽者祁門汪先生德輔父間常因其成法別為義例以吉凶軍兵嘉五禮之目會粹成書名曰經禮補逸辭約而事備讀者便焉學禮之士誠能因汪氏之所緝以達于朱子之書則三千三百之目雖不可復覩其全然郁于文之盛豈不若身履而目擊之矣乎昔者竊聞之禮樂之在天下有君無臣則不能以明制作之本臣能而君不之好則議論無益于當時必有大有為之君而復有善制作之臣因治定功成之餘以明中和之化而後禮樂之興可必然則此其時也惜乎先生老且病矣

明良在上寧不有徵于斯文矣乎先生生朱子之鄉嘗游番易吳公可翁之門篤志古學老而彌厲著書滿家真古所謂鄉先生者也間出是書以相視且謂先人與吳公為同志友故俾序焉魯于先生無能為役然承命不聽辭也

洪武二年歲在己酉秋八月下澣臨江諸生曾魯序

經禮補逸卷之一

吉禮

郊祀

禮器因天祀天祀帝于郊敬之至也。周禮大祝辨六號一曰神號凡大禋祀則執明水火而號祝隋釁逆牲送尸令鐘鼓右亦如之來瞽令臯舞相尸禮既祭令徹大宰祀五帝則掌百宮之誓戒與其具備前期十日帥執事而卜日遂及執事眡滌濯及納亨贊王牲事及祀之日贊玉幣爵之事祀大示亦如之大宗伯凡祀大神祭大示帥執事而卜日宿眡滌濯蒞玉鬯省牲奉玉盞詔大號治其大禮詔相玉之大禮若王不與祭祀則攝



位小宗伯凡祀大神祭祀省牲眡滌濯祭之日逆盥省饗祭法  
祭天燔柴于泰壇用騂犢祭統及時將祭君子乃齋散齋七日  
致齋三日司服掌主之吉服王祀昊天上帝則服大裘而冕司  
裘掌為大裘以供王祀天之服大宗伯以玉作六器以禮天地  
四方以蒼璧禮天牲饗放其器之色典瑞掌玉瑞玉器之藏四  
圭有邸以祀天玉人之事天子圭中必四圭尺有二寸以祀天  
鼓人以雷鼓：神祀大司樂以六律六同五聲八音六舞大合  
樂以致鬼神示乃分樂而序之以亨以祀乃奏黃鐘歌大呂舞  
雲門以祀天神凡樂六變而致象物及天神圜鐘為宮黃鍾為  
角大簇為徵姑洗為羽靄鼓靄鼗孤於之管雲和之琴瑟雲門  
之舞冬日至于地上之圜丘奏之若樂六變則天神皆降可得  
而禮矣禮運故禮行于郊而百神受職焉禮器因地事地凡以  
神仕者掌三辰之法以猶鬼神示之居辨其名物以冬日至致  
天神人鬼大祝辨六號三日示號凡祭示則執明水火而號祝  
隋蒙逆牲送尸鍾鼓右亦如之來瞽令皋舞相尸禮既祭令徹  
大宰祀大示則宰百官之誓戒與其具修前期十日帥執事而  
卜日遂戒及執事眡滌濯及納亨替王牲事及祀之日替玉幣  
爵之事大宗伯祭大示帥執事而卜日宿眡滌濯淮王鬯省牲  
饗奉玉盥詔大號治其大禮詔相王之大禮若王不典祭祀則  
攝位祭法祭地瘞埋泰折用騂犢大宗伯以黃琮禮地牲幣放



其器之色典瑞西圭有邸以祀地玉人之事西圭五寸有邸以祀地大司樂以六律六同五音八音六舞大合樂以致鬼神示乃分樂而序之以享以祀乃奏大簇歌應鍾舞咸池以祭地示一变而至羽物及川澤之示再变而致羸物及山林之示三变而致鱗物及丘陵之示四变而致毛物及墻衍之示五变而致介物及土示凡樂函鍾為害大簇為角姑洗為徵南呂為羽靈鼓靈鼗絲竹之管室桑之琴瑟咸池之舞夏日至於澤中之方丘奏之若樂八变則地示皆出可得而禮矣

愚按大司樂六奏六歌之說奏以陽聲歌以陰聲：之陰陽各有合則得其和矣如祀天圜丘以圜鍾為宮圜鍾即夾鍾也夾鍾主房星昴位為天帝明堂故為天之宮祭地方丘以函鍾為宮函鍾即林鍾也林鍾主井鬼未坤之位而天社在井鬼之外天社地神也故為地之宮他如宗廟之中以黃鍾為宮黃鍾主虛危子位為宗廟故為人之宮此三宮取義明矣然而夾鍾為宮者黃鍾為角太簇為徵姑洗為羽林鍾為宮者太簇為角姑洗為徵南呂為羽黃鍾為宮者大呂為角大簇為徵應鍾為羽究其所以取角徵羽者與黃鍾正宮夾鍾林鍾旋宮之法皆不相應鄭註仍從隔八相生之序求之不合則有辟之不用之說竟未明切蓋夾鍾而下以黃鍾太簇姑洗為用者取陽律之相次也天尚道故取其次之自然

也林鍾而下以大簇姑洗南呂為用者取律呂之相生也地尚功故取其功之所生也黃鍾而下以大呂大簇應鍾為用者取律呂之相合也人尚情故取諸相合情之所感也大抵五聲初無定用不過從其律之長短以分聲之清濁而後協其序耳其于五聲獨不言商者何商屬金有剛堅殺伐之聲祭尚柔樂尚和故不用耳。

書召誥越翼日戊午社于新邑禮器郊之祭也迎長日之至也大根天而主日也兆于南郊就陽位也掃地而祭于其質也器用陶匏以象天地之性也於郊故謂之郊牲用騂尚赤也用犢貴誠也郊之用羊也周之始郊日以至曲禮天子祭天地歲徧

疏曰地神有二歲有二祭夏至之日祭崑侖之神于方澤一也夏至之月祭神州地祇于北郊二也或云建申之月祭之與郊天相對其配地之神孝經緯既云后稷為天地之主則后稷配天南郊又配地北郊則周人以饗配園丘亦當配方澤也王制祭天地之牛角繭栗喪三年不祭唯祭天地商書昭告于

上天后土周書告于皇天后土月令季秋上丁命樂正入學習吹為將享祭也春秋重舞秋冬重吹是月也大饗帝此大享與帝連文故曰祭天詩思文后

稷克配彼天周頌我將我享維羊維牛維天其右之既右享之我其夙夜畏天之威于時保之

愚按韓子謂郊焉而天神格廟焉而人鬼享我將之詩于天言庶其降鑒于文王則直曰既右享之盖上帝之尊冀其來降有不敢必文王之親則必其來享也尊：親：之道非周

公其孰能知乎

樂記祀乎明堂而民知孝：經昔者周公知郊祀后稷以配天宗祀文王于明堂以配上帝是以四海之內各以其職來祭諸侯修其職來助祭

程子曰萬物本乎天人本乎祖故冬至祭天而以祖配之以冬至氣之始也萬物成刑于帝而人成形于父故季秋享帝而以父配之以季秋成物之時也。陳氏曰天即帝也郊而曰天所以尊之也故以后稷配焉后稷遠矣配稷于郊亦以尊稷也明堂而曰帝所以親之也以文王配焉文王祖也配文王于明堂所以親文也尊：而親：周道修矣然則郊者古禮而明堂周制也。楊氏曰郊祀配天明堂配上帝天與上帝一也祀上帝如郊祀然月令有大享之文我將之詩有維羊維牛之語則明堂之禮為尤備致堂胡氏曰明堂雜見于孝經孟子詩與禮記其制之詳不可得而聞矣後世紛々之論以理考之先王舉事動可為憲必不如後世之妄作耳王者向明而治古之堂今之殿也孝經以為宗祀之所孟子以為王政之堂然則是人君之路寢猶後世大朝會之正衙也王者朝群臣覲諸侯頒朔布政皆于是焉故曰欲行王政則勿毀也則何以于此宗祀文王已有廟矣以季秋享帝而奉文王配焉不可于七廟中獨舉大禮于一廟故迎主致之

明堂以配帝也。祭帝必于明堂者，帝出震而宰萬物，猶向明而治天下也。

春秋傳

僖公三十一年公羊專

養牲養二上帝，牲不吉則板稷牲而卜之。帝

牲在于滌，三月于稷者，唯具是視。

按滌宮名，養帝牲三牢之處也。謂之滌者，取其蕩滌之潔。

清三牢者，各主一月，取三月一時足以充其大牲。

又曰：郊則曷為必祭稷？王者必以其

祖配王者，則曷為必其以祖配？自內出者無配，不行自外至者

無主，不至大戴禮公冠篇祝辭：皇，上天照臨，下土集地之靈。

降甘風雨，庶物資生，各得其所，靡今靡古。維予一人，其敬拜皇

天之祐。古祝辭則云：祀王其或一人，其王者親告之辭也。

愚按：郊祀天地之禮，後世有合祭分祭之異論者，紛如參之。

舜典類于上帝，類本非常祀也。舜以受終而祭告于天，其禮

依郊祀為之，故曰類。蓋類帝之中，拜及天地，故下文止以六

宗山川群神言而不及地矣。又若歲四方，巡守柴望，秩于山

川，蓋亦燔柴祀天之中，并及于地，故下文直以山川言而不及

地矣。使類柴之外，皆不及地而遽望于山川，舉小遺大，可

乎？武城柴望，大告武成，周頌巡守，告祭柴望，其禮皆然。故望

者，郊之微也。不郊猶望，春秋譏之。大祗祭告，從其所主，尊

則可以統卑，卑則不可以屈尊。如祀五帝于四郊，則各從

其方之帝為主，而不及昊天矣。禮地亦然，是知祭天必及地

者，尊可以統卑也。初無所謂合祭曰祭，曰合曰別，則由新莽



百縣雩祀百辟鄉士有益于民者以祈穀寔陽氣盛而常旱山川百源能與雲雨者也衆水始所出為百源必先祭其本乃雩吁嗟求雨之祭也雩祭謂為壇南郊之傍雩五精之帝配以先帝也自鞞鞞至祝敵故皆作曰盛樂凡他舞用歌舞而已百凡周之中五月之中而早亦修雩禮以求雨因著正雩此月失之矣天子雩上帝諸侯以下雩上公故雖早禮有禱無雩春秋左氏傳龍見而雩按龍見建巳之月東方乃物始盛待雨而大故祭天遠為百穀祈膏雨

愚按冬至之郊為大報天正月之郊專為祈穀二郊不同皆配以后稷此先王所以定天位賤百神之大典也若成王賜

魯重祭雖賜受皆非今攷春秋宣成定哀之改卜牛皆在春正月僖之卜在四月則是止于祈穀之郊而非大報之禮亦明矣

詩噫嘻噫嘻成王既昭格爾率時農夫播厥百穀駿發爾私終三十里亦服爾耕十千維耦  
愚按是詩小序謂春夏祈穀于上帝蓋成王初置田官而戒之以督功之事也

### 旅帝禮

大宗伯國有大故則旅上帝掌次王大旅上帝則張絜案設皇邸典瑞四圭有邸以祀天旅上帝職全旅于上帝則共其金版

### 祀五帝禮

小宗伯兆五帝於四郊兆為壇之營域按封人云社稷之壇土外營域有壇可知

大司寇禋祀五帝則戒之日涖誓百官戒于百族及納亨前五  
祭之日亦如之奉其明水火小司寇禋祀五帝實鑊水納亨亦  
如之士師祀五帝則沃尸及王盥泊鑊水大司徒祀五帝奉牛  
牲羞其肆充人掌繫祭祀之牲牲祀五帝則繫于牢芻之三月  
掌次祀五帝則張大次小次設重帟重案司服祀昊天上帝則  
服大裘而冕祀五帝亦如之大宗伯以玉作六器以禮天地四  
方以蒼璧禮天以璜琮禮地以青圭禮東方以赤璋禮南方以  
白琥禮西方以玄璜禮北方皆有牲幣各放其器之色祭法埋  
少牢于泰昭祭時也家語五帝德篇季康子問于孔子曰奮聞  
五帝之名而不知其寔請問何謂五帝孔子曰昔丘也聞諸老  
聃曰天有五行水火木金土分時化育以成萬物其神謂之五  
帝古之王者易伐而改號取法五行五行更王終始相生亦象  
其義故其為明王者而取配五行是以太皞配木炎帝配火黃  
帝配土少皞配金顓頊配水

#### 四類禮

小宗伯兆五帝于四郊四類四望亦如之按四類兆日於東郊  
兆司中司命于南  
郊兆兩師于北郊

#### 四望禮六

小宗伯兆五帝于四郊四望亦如之大宗伯國有大故則旅上  
帝及四望大司馬中秋教治兵遂治獮田羅弊致禽以祀枋大

宗伯以鬯辜祭四方鬯人掌共秬鬯而飭之凡四方用蜃凡鬯  
事用散牧人望祀各以其方之色牲毛之司服王祀四望別毳  
冕大宗伯以青圭禮東方以赤璋禮南方以白琥禮西方以玄  
璜禮北方皆有牲幣各放其器之色玉人之事兩圭五寸有邸  
以旅四望大司樂乃奏姑洗歌南呂舞大磬以祀四望舞師教  
羽舞帥而舞四方之際祀男巫掌望祀望衍授號旁招以茅月  
令季秋天子乃厲飾執弓挾矢以獵命主祠祭禽于四方曲禮  
天子祭四方歲編祭法四坎壇祭四方也詩以社以方春秋傳  
天子有方望之事無所不通也

### 迎氣禮

月令孟春之月先立春三日太史謁之天子曰某日立春盛德  
在木天子乃齋立春之日天子親帥三公九卿諸侯大夫以迎  
春于東郊孟夏之月先立夏三日太史謁之天子曰某日立夏  
盛德在火天子乃齋立夏之日天子親帥三公九卿諸侯大夫  
以迎夏于南郊孟秋之月先立秋三日太史謁之天子曰某日立  
秋盛德在金天子乃齋立秋之日天子親帥三公九卿諸侯大  
夫以迎秋于西郊孟冬之月先立冬三日太史謁之天子曰某  
日立冬盛德在水天子乃齋立冬之日天子親帥三公九卿諸  
侯大夫以迎冬于北郊

### 祭寒暑禮



祭法相逆于坎壇祭寒暑也月令仲春天子乃鮮羔開冰籥章掌土鼓豳籥中春晝擊土鼓歛豳詩以逆暑中秋夜逆寒亦如之春秋傳黑牡秬黍以饗司寒祭寒而藏之

愚按籥章中春逆暑中秋逆寒與月令季春出火季秋內火仲春帥內外命婦始蠶此皆與今四時合及攷大司馬正月之吉始和布政于邦國州長正月之吉屬民讀法正歲則讀教法如初是則正月正歲不同一時明矣鄭注謂正月周之正月正歲夏之正月遂使後人益信周之改月豈知正月之吉始和乃今正月天氣下降地氣上騰天地和同草木萌動是謂始和之月也若指此為子月則陰氣既盛陽氣尚微感發栗烈於此方殷果何取其始和乎要之正月本今正月正歲乃所謂周以子為歲首者也夫自正月讀法至子月復讀故曰如初若以正歲為夏之正月則如初又何所指乎鄭注徒見木鐸狗令一節與夏書孟春月令遂指正歲為夏正曾不思夏以寅月為歲首則以寅月狗木鐸周以子月為歲首則以子月狗木鐸安可例以周之狗鐸在寅月而謂寅月為正歲乎借曰狗鐸之特政可改而始和之天氣不可改也因并論之

### 朝日禮

玉藻天子玄端而朝日于東門之外端當為冕東門謂國門也禮罷為朝夕

必放於日月掌次朝日則張大次小次設重帘重案次謂帷也

止居也小幄既接祭退俟之馮相氏冬夏致日典瑞掌玉瑞玉

器之藏辨其名物與其用事設其服飾王晉大圭執鎮圭纁籍

五采五就以朝日書堯典分命羲和宅嵎夷曰暘谷寅賓出日

大傳古者帝王躬率有司百執事而以正月朝迎日于東郊所

以為萬物先而尊事天也祀上帝于南郊所以報天德迎日之

辭曰維某年月上日明光于上下勤施于四方旁作穆維予

一人其敬拜迎日東郊周語古先王既有天下又崇之于上帝

明神而敬事之于是乎有朝日夕月以教民事君按上帝大也

魯語天子大采朝日與三公九卿祖識地德曰中攷政與百官

之政事師尹維旅牧相宣序民事少采夕月與大史司載糾虔

天刑日入監九御使潔奉禘郊之粢盛而後即安

祀日月星辰禮

大宗伯以寔柴祀日月星辰按實柴實牛柴上也星謂五典瑞

圭璧以祀日月星辰圭其邸為璧月令祈来年于天宗天宗日

亦是玉人之事圭璧五寸以祀日月星辰祭法王宮祭日夜明

祭月幽宗祭星按王宮日壇王君也日稱君宮壇營域也夜明

也星以昏始見崇之言營也按春秋傳曰日月祭義祭日於壇

星辰之神則靈雷風雨之不時于是乎崇之

祭月于坎祭日於東祭月於西春分朝日秋莫夕月祭日於壇

祭日于東用朝旦之時祭月于西鄉夕之時

祀司中司命風師兩師禮

大宗伯以禋燎祀司中司命飆師兩師飆音風禋積也積柴實以根陽也鄭司農云司中三能三階也司命文昌宮星風師箕也而師畢也性體焉燔燎而升烟所

愚按立春後丑日祭風以丑近箕次箕主風立夏後申日祭雨以申近畢次畢主雨故皆取先日以迎祭也

救日月禮

曾子問天子救日置五麾陳五兵五鼓諸侯置三麾陳三鼓三兵大夫擊門士擊柝言充其陽也麾旌旗也五兵矛戟楛弓矢柝兩木相擊凡有聲皆陽事以歷諸侯從天子救日各以其方色與其兵方色者東方衣陰氣諸侯從天子救日各以其方色與其兵青南方衣赤西方衣白北方衣黑周禮有救日之官未聞兵之細制隱義云東方用戟南方用矛西方用桴北方用盾中央用鼓以日食陰侵

陽臣強之象示欲助天子討陰也亦俗非常穀梁云日食是陰之灾故象五方之色以兵討之也

鼓人救日月則詔王鼓救日月食王必大僕凡軍旅田役贊王

鼓救日月亦如之庭氏救日之方救月之矢謂日月之食陰陽相勝之變也于日

食則射大陰月食則射大陽不言救大司樂凡日月食命去樂

夫樂藏春秋昭公十七年夏六月甲戌朔日有食之祝史請所

用禮正陽之月日食常用幣昭子曰日有食之天子不舉伐鼓

於社諸侯用幣於社伐鼓于朝禮也平子禦之禦禁也曰止也准

正月朔慝未作日有食之於是乎有伐鼓用幣禮也其餘則否

太史曰在此月也正月謂建巳正陽之月于周為六月于夏為

侵陽故有伐曰過分而未至過春分三辰有災于是乎百官降

鼓用幣之禮

物降物謂素君不舉辟移時樂奏鼓伐鼓祝用幣於史用辭以自

責平子弗從傳見左書胤征乃季秋月朔辰弗集于房擊奏鼓奮

夫馳庶人走辰日月所會房所舍之處集合也不合則日食可

伐之畜夫主幣之官馳取幣于社責上公擊樂官進鼓則

也疏季秋九月之朔日月當合于辰其日月不合于舍不得合

辰謂被月食日有食之禮有救日之法于時鼓人樂官進而擊

之畜夫馳聘而取幣以禮天伸庶人奔走供救日之百役此為

災異之左傳文公十五年六月辛丑朔日有食之鼓用牲于社

非禮也得常鼓之月而於日有食之天子不舉去盛也伐鼓于社

伐猶擊也社用牲為非禮諸侯用幣于社社尊于諸侯故請伐鼓于朝退

陰故鼓于社諸侯用幣而不責之也古之道也

也古之道也

### 祀社稷禮四

小司徒凡建邦國立其社稷大司徒設其社稷之壝而樹之田

主各以其野之所宜木遂以名其社與其野小宗伯掌建國之

神位右社稷左宗廟封人掌設王之社壝為畿封而樹之凡封

國設其社稷之壝封其四疆造都邑之封邑者亦如之令社稷

之職封國謂匠人營國左祖右社大宗伯以血祭社稷司服

王祭社稷則希冕皂人掌共柜鬯而飾之凡祭祀社壝用大鼎

鼓人以靈鼓社祭舞師教恢舞師而舞社稷之祭祀肆師社

之日涖卜來歲之稼大司馬中春教振旅遂以蒐田獻禽以祭

社月令仲春擇元日命社民明堂位春社王制天子祭社稷皆

太牢諸侯祭社稷皆少牢祭法王為群姓立社曰大社王自為

立社曰王社諸侯為百姓立社曰國社諸侯自為立社曰侯社  
大夫以下成郡立社曰置社郊特牲天子大社必受霜露風雨  
以達天地之氣也州長若以歲時祭祀州社則屬其民而讀法  
凡州之大祭祀泚其事祭法曰厲山氏之有天下也其子曰農  
能植百穀夏之哀也周弃繼之故祀以為稷共工氏之霸九州  
也其子曰后土能平九州故祀其以為社孝經緯社者五土之  
總神稷者原隰之神五穀稷為長五穀不可偏敬故立稷以表  
名郊特牲社祭土日用甲唯為社事單出里唯為社田國人畢  
作唯社丘乘共粢盛書曰篇大社唯松東社唯栢南社唯梓西  
社唯栗北社唯槐論語哀公問社於宰我宰我對曰夏后氏以

松殷人以栢周人以栗詩迺立家土戎醜攸行社也大甫田

以我齊明與我犧羊以社以方雲漢祈年孔夙方社不莫春秋  
左傳昭公二十九年共工氏有子曰句龍為后土后土為社稷  
田正也有烈山氏之子曰柱為稷自夏以上配祀之周棄亦為  
稷自商以來祀之春秋文義曰天子之稷社廣五土諸侯半之  
其色如何春秋傳曰天子有大社為東方青色南方赤色西方  
白色北方黑色土冒以黃土故將封東方諸侯青土苴以白茅  
禮器社稷山川之事鬼神之神祭體也禮運禮行于社而百貨可  
極焉

愚按社者地示之別祭而亦禮之大者如召誥下已用牲于

郊越翌日戊午乃社于新邑此自郊之外而又專祭社也禮  
曰饗帝于郊祀社于國又曰郊所以明天道社所以明地道  
中庸曰郊社之禮所以事上帝註者曰不言后土者省文也  
是則或以社對帝或以社對郊或合郊社而並言其為禮之  
大可見已然社之為祭固為地設論者若專指社為祭地而  
曰地不與于郊天不可也要之祭天可拜及地而其統則兼  
體不遺禮地雖不可屈天而其寔則尊歸于一也

祀山川禮五

小宗伯兆山川丘陵墳衍各因其方大宗伯以血祭：五嶽以  
豕沈祭山林川澤月令孟春命祀山林川澤犧牲毋用牝仲夏

命有司為民祈祀山川百源大雩帝用盛樂乃命百縣雩祀百  
辟卿士有益于民者以祈穀寔仲冬天子命有司祈祀四海大  
川名源淵澤井泉季冬乃畢山川之祀司服王祀山川則毳冕  
典瑞璋邸射以祀山川玉人璋邸射素功以祀山川鬯人掌共  
鬯鬯而飾之凡山川用蜃大司樂奏蕤賓歌函鍾舞大夏以祭  
山川舞師掌教兵舞帥而舞山川之祭祀山虞若祭山林則為  
主而修除且蹕書舜典望秩于山川大傳諸侯祭名山大川之  
在其地者王制天子祭天下名山大川五嶽視三公四瀆視諸  
侯其餘山川視伯小者視子男視謂視其牲  
器之數曲禮天子諸侯祭  
山川歲徧周公祀泰山召公為尸學記三王之祭川也皆先河

而後海詩周頌時邁懷柔百神及河喬嶽

經禮補逸卷之一



國家圖書館, NATIONAL CENTRAL LIBRARY, TAIWAN, R.O.C.

經禮補逸卷之二

吉禮

祠禮

大宗伯以祠春享先王司尊彝春祠夏禴禋用鷄彝鳥彝皆有  
舟其朝踐用兩獻尊其再獻用兩象尊皆有壘籩人凡祭祀共  
其籩薦修之寔牧人凡時祀之牲必用牲物詩天保禴祠烝嘗  
于公先王

愚按春祠夏禴秋嘗冬烝此周制時饗之定名也詩云禴祠  
烝嘗蓋取咏歌以叶韻耳其寔非有異也

春秋昭公十五年二月癸酉有事于武宮



愚按周官祠禴烝嘗為四時之祭左氏傳曰禘于武宮是以禘為四時之祭蓋見經書禘于莊公遂例以為禘而誤耳考之王制春日禘夏曰禘此蓋夏殷之祭名與周不同蓋周更時祭之名而後禘為大祭也然有事武公乃春祠之祭曷不以祠祭之名書而止曰有事蓋祭之日叔弓准事籥入而卒去樂卒事雖祭得時而不成于禮春秋乃變文而書之以著其失也

### 禴禮

大宗伯以禴夏享先王司尊彛春祠夏禴裸用鷄彛鳥彛皆有舟其朝踐用兩獻尊其兩獻用兩象尊皆有壘王制天子植杓詩禴祠烝嘗易既濟九五東隣殺牛不如西隣之禴祭

### 嘗禮

大宗伯以嘗秋享先王司尊彛秋嘗冬烝裸用牛彛黃彛皆有舟其朝獻用兩著尊其饋獻用兩壺尊皆有壘肆師嘗之日淮下來歲之芟詩烈祖顧予烝嘗湯孫之將閔宮秋而載嘗春秋桓公十四年八月壬申御廩災乙亥嘗

愚按嘗以物成而薦新故曰嘗周之八月乃夏六月物未大成嘗非時也况禦廩壬申災嘗以乙亥距四日間乃汲以災餘共染盛是有合于周官祭享前期十日帥執事而卜日誓戒之禮乎春秋書之志不敬也

左氏傳凡祀始殺而嘗襄公二十八年十一月乙亥嘗于太公之廟慶舍牲事麻嬰為尸慶集為上獻

### 烝禮

大宗伯以烝冬享先王大司馬中冬教大閼獻禽以享烝司尊彝秋嘗冬烝裸用芻粢黃粢皆有舟其朝獻用酉著尊其饋獻用兩壺尊皆有罍書洛誥戊辰王在新邑烝祭歲文王駢牛一武王駢牛一王入太室裸在十有二月

愚按課灌也灌必用秬鬯者以秬米為酒名秬鬯酒人掌之凡祭祀共酒以往將酒祭則蒸鬱和之乃名鬱鬯取其香芬陰達以降神也在十有二月以戊辰祭日在是月也

春秋桓公八年春正月己卯烝夏五月丁丑烝左氏傳閉蟄而烝

愚按周官祠禴嘗烝為四時之祭是已攷之春秋常祭不書書必有譏如桓公八年春夏兩以烝書者譏其不時而且黷如桓公十四年八月嘗本得其時蓋曰其壬申御廩災越四日乙亥嘗譏以災餘之粟祭為不敬也如昭十五年春二月有事于武宮蓋春祠也如宣八年夏六月有事于太廟即夏禴也祭得其時于祭無譏故不書名止云有事所以書者一則譏宣公以仲遂之喪猶禴而薦入去籩是忘大臣之哀一則譏昭公以叔弓之喪籩入而去鼎卒事是殺宗廟之禮其

一取義各有所重也

### 禘祠禮

曾子問禘祭於祖則祝迎四廟之主：出廟入廟必蹕迎高曾祖稱入太祖之廟也

### 禘禴禮

曾子問禘祭於祖則祝迎四廟之主春秋宣公八年六月辛巳有事于大廟王氏曰當是禴祭

### 禘嘗禮

王制天子禘嘗諸侯嘗禘春秋文公二年八月丁卯大事于太廟韋梁傳曰禘嘗

愚按春秋時祭則書有事如有事于太廟有事于武宮之類是也禘祭則書大事如此書大事于太廟是也蓋時祭之禘則祝迎四廟之主合食于太祖之廟而毀廟之主不與及三年大禘則毀廟之主亦與焉韋梁以大事為禘嘗左氏外傳又以為禘烝苟以大事為時禘則大禘為之有事可乎書法曰有曰大其別時禘大禘之義明矣

### 禘烝禮

王制天子禘烝諸侯烝禘

愚按烝衆也以冬日時物畢成薦修豈備故曰烝禘合也天子時于此時升群廟之主合食于太祖之廟故曰禘烝謂時

禘也諸侯降于天子止于秋冬成物之時得合祭焉不得  
天子之時禘故曰烝禘皆變文以明禮制之辨也

### 天子大禘禮

大宗伯以肆獻裸饗先王玉人之事裸珪尺有二寸有瓚以祀  
廟大宗伯享大鬼帥執事而卜日宿眎滌濯牲玉鬯省牲護奉  
玉盞詔大號大司徒祀五帝奉牛牲羞其肆饗先王亦如之充  
人掌繫祭祀之牲牲祀五帝則繫于牢芻之三月享先王亦如  
之內饗凡宗廟之祭祀掌割烹之事鼓人以路鼓之鬼享大司  
樂乃奏無射歌夾鍾舞大武以饗先祖大傳禮不王不禘王者  
禘其祖之所自出以其祖配之儀禮喪服傳諸侯及其太祖天  
子及其祖之所自出祭法有虞氏禘黃帝而郊嚳祖顓頊而宗  
堯夏后氏禘黃帝而郊嚳祖顓頊而宗禹殷人禘嚳而郊冥祖  
契而宗湯周人禘嚳而郊稷祖文王而宗武王

愚按有虞氏禘黃帝而郊嚳夏后氏禘黃帝而郊嚳其祀同  
乎曰嚳與嚳不同也曷為不同曰嚳夏后氏之父也夏后氏  
之天下受于舜非受于嚳也嚳治水九載績用弗成舜殛之  
羽山非舜殛之也明天刑以討之天下之至公也嚳服舜刑  
則為天下之罪人矣禹既受舜禪而升罪人以配天其可以  
天下私其父而同嚳之祀哉夫大事于太廟躋僖公春秋尚  
譏其逆祀則禹之私其父而送于舜且不送于天子天其弗

享夏后氏之郊矣曰然則禹之于縣也如之何曰廟以祭之禮也何必郊雖然禹聖人也而豈為是哉祭法之言蓋以歷序數聖人郊禘之禮遂例及焉不足信也讀者察焉

明堂位季夏六月以禘禮祀周公于太廟牲用白牡尊用犧象

山罍鬱尊用黃目灌用玉瓚大圭薦用五豆雕篚損管反爵用玉

琖仍雕加以璧散璧用俎用祝蕨歌升歌清廟下而管象朱干

玉戚冕而舞大武皮弁素積楊而舞大夏孟獻子曰七月曰至

可以有事于祖七月之禘獻子為之也玉藻大亨其王事與平

王牲魚腊四海九州之美味也邊豆之薦四時之和氣也內金

示和也束帛加璧尊德也龜為前列先知也金次之見情也丹

漆絲纒竹箭與衆共財也其餘無常皆各以其國之所有則致

遠物也其出也肆夏而送之蓋重禮也禮運禮行于祖廟而孝

慈服為詩頌長發大禘而歌玄王桓撥相土烈之上帝是祗帝

命式于九圖

### 大禘禮

大宗伯以肆獻裸饗先王曾子問禘祭于祖則祝迎四廟之主

春秋文公十一年公羊傳禘祭毀廟之主陳于太祖未毀廟之

主皆升合食于太祖五年而再殷祭禮器大饗腥三獻燔潛一

獻孰

### 諸侯大禘禮

大傳禮諸侯大事及其大祖大夫士有大事者于其君于祫及其高祖按大祖受命君也大事冠戎之事也省善也善于其君謂免于大難也于猶室也室拾謂無廟拾祭之于壇墀春秋文二年八月丁卯大事于太廟躋僖公穀梁傳拾祭者毀未毀廟之主皆升合祭于大祖范氏注拾祭者皆合祭諸廟已毀未毀者之主于大祖廟中以昭穆為次序父為昭子為穆大祖東向昭南向穆北向孫從王父坐也祭畢則復還其廟何氏注昭取其向明穆取其北面尚敬

饗先妣禮

大司樂乃奏夷則歌小呂舞大濩以享先妣

愚按後世帝王其始祖之配自配饗於始祖則無此廟立廟自后稷為始祖姜嫄無所始是以特立廟而祭之先妣姜嫄也姜嫄履大人跡而生后稷是周之先母也

繹禮

禮器曰為祊乎外郊牲特曰繹之於庫門內書高宗彤日

愚按彤祭明日又祭之名也殷曰彤周曰繹名不同而複祭之禮同也

詩鳧鷖篇鳧鷖在涇公尸來燕來寧朱子傳祭之明日假樂篇之綱之紀燕及朋友朱子傳公尸所以答鳧鷖春秋宣公八年壬午猶繹之萬入去籥

薦寢廟禮

月令仲春天子乃鮮羔開冰先薦寢廟季春薦鮪于寢廟孟夏以彘嘗麥先薦寢廟孟秋嘗新先薦寢廟仲秋以犬嘗麻先薦

寢廟季秋以犬嘗稻先薦寢廟季冬嘗魚先薦寢廟詩潛之篇  
有鱸有鮪鯨鱣鯉以享以祀以介景福

### 天子遷廟禮

春秋文公二年穀梁傳作主壞廟有時日於練焉壞廟壞廟之道易擔可也改塗可也禮以次行遷廟事畢請就燕君出廟門卿大夫有司執事者皆出廟門告事畢乃曰擇日而祭焉

愚按檀弓殷既練而祔周卒哭而祔孔子善殷左氏謂君薨卒哭而祔：而作主穀梁謂吉主于祔練于練焉壞廟則待練而始祔二氏之說于殷周之制各有合然禮既葬作主于墓而反虞孝子皇：不忍一日忘其親

也苟卒哭而易主遷廟遽用吉祭孝子豈忍急于鬼其親乎胡氏取穀梁祔練之說蓋以其合殷而孔子善之為得禮之本也

### 諸侯遷廟禮

大戴禮成廟將遷之新廟君前徙三日齋祝宗人及從者皆齋徙之日君玄服從者皆玄服從至于廟群臣如朝禮位君入位立于阼階下西向有司如朝位宗人擯舉手曰有司其請升君升祝奉幣從在左北面再拜興祝聲三曰孝嗣侯某敢以嘉幣告于皇考某侯成廟將徙敢告君及祝再拜興祝曰請導君降立于階下奉衣服者皆奉以從祝奉衣服者降堂君及在位者

皆辟也奉衣服者至碑君從有司皆以次從出廟門奉衣服者升車乃步君升車從者皆就車也凡出入門及大溝渠祝下擯至于新廟筵于戶牖間尊于西序下脯醢陳于房中設洗當東榮南北以堂深有司皆先入如朝位祝導奉衣服者乃入君從奉衣服者入門左在位者皆辟也奉衣服者升堂皆反位君從升奠衣服于席上祝奠幣于几東君北向祝在左贊者盥升適房薦脯醢君盥酌奠于薦西反位君及祝再拜興祝聲三曰孝嗣侯其敬用嘉幣告于皇考其侯今日吉日可以徙于新廟敢告再拜君就東廂西面祝從西廂東面在位者皆反走辟如食間祝請反位君反位祝從在左卿大夫及衆有司諸在位者皆反位再拜畢事

愚按諸侯廟制二昭穆與太祖而為伍也本諸祭法曰考廟曰皇考廟曰皇考廟則皆月祭之曰顛考廟曰祖考廟則不得月祭唯四時祭之而已若高祖之父其廟既毀藏主于祖考之廟中若有祈禱則出受壇祭而不得四時之祭矣至高祖之祖其主亦藏祖考廟中若有祈禱則出受禫祭而又不得在壇之祭矣迨夫去禫而為鬼者雖有祈禱而祭亦不及焉蓋以親過高祖則毀廟而遷之禮也是故武宮之立春秋譏之則凡親盡不毀者皆無合于先王祭法之正也



雜記成廟則釁之雞人凡祭祀面犧釁共其雞牲祝宗人宰夫  
饗人皆爵弁純衣饗人拭羊宗人祝人宰夫北面于碑南東上  
饗人舉羊升屋自中二屋南面剖羊血流于前乃降門夾室皆  
用雞先門而後夾室其血皆于屋下剖雞門南門夾室中室有  
司皆向室而立門則有司當門北面既事宗人告事畢乃皆退  
反命于君曰釁某廟事畢反命于寢君南嚮于門內朝服既反  
命乃退凡宗廟之器其名者成則釁之以豶豚

### 宗廟禮

玉藻宗廟之祭仁之至也曾子問曰宗子為士庶子為大夫其  
祭也如之何孔子曰以上牲祭于宗子之家祝曰孝子其介子

其薦其常事若宗子有罪居于他國庶子為大夫其祭也祝曰  
孝子其使介子其執其常事攝其常事攝主不厭祭不旅不做  
不綏祭不醜布奠于賓之奠而不舉不歸內其辭于賓曰宗兄  
宗弟宗子在他國使其曾子問曰宗子去在他國庶子無爵而  
居者可以祭乎孔子曰祭曰請問其祭如之何孔子曰望墓而  
為壇以時祭若宗子死告于墓而後祭于家宗子死稱名不稱  
孝。經為之宗廟以鬼享之大司樂乃分樂而序之凡樂黃鍾  
為宮大呂為角大族為徵應鍾為羽路鼓路鼗陰竹之管龍門  
之琴瑟九德之歌九磬之舞于宗廟之中奏之若樂九變則人  
思可得而禮矣周易萃王假有廟用大牲吉祭統夫祭也者必

夫婦親之

愚按宗廟之祭君牽牲夫人薦盎君割牲夫人薦酒此皆夫婦親之禮也所以然者夫婦足以盡陰陽之義而一氣感通之誠無間于顯微則虔敬之心亦與之無間于存沒故倅然見乎其位肅然聞乎其聲此鬼神之常理也不可度思矧可射思夫安得不敬乎此又交神明奉祭祀之本也

齊禮

祭統致齊于內散齊于外齊之日思其居處思其笑語思其志意思其所樂思其所嗜齊三日乃見其所為齊者膳夫王齊日三舉王府王齊則共玉食粢人凡王之齊事共其秬鬯禮器魯人將有事于上帝必先有事于類宮晉人將有事于河必先有事于惡呼池徒河反齊人將有事于泰山必先有事于配林七日戒三日宿慎之至也祭統及時將祭君子乃齊散齊七日致齊三日是故君子非有大事也非有恭敬也則不齊

愚按虞書之稱曰克曰欽明又曰允恭大雅之述文王曰於緝熙敬止又曰不顯亦臨無射亦保孔子之語方仲曰出門如見大賓使民如承大祭是則君子之所以為德者恭敬而已矣恭敬也者不可須臾離也可離不足以語君子也祭統曰君子非有大事也非有恭敬也則不齊何也蓋于君之存乎恭敬固不待于齊也齊則所以薦其恭敬而致其誠也謂

之非有大故則不齊猶可也謂之非有恭敬則不齊其說之  
陷而不可舉也甚矣信斯言也是則恭敬僅存于齊之時不  
齊之時則不恭敬矣果可以語君子之道乎大抵漢儒記禮  
之言徃：騁于文而昧于理其言之類此者不絕于編也蓋  
學者攷而擇焉斯得矣

### 禮尸禮

禮器周坐尸詔侑武無方夏立尸而卒祭殷坐尸周旅酬六尸  
郊特牲舉犖角詔妥尸古者尸無事則立有事而後坐也尸神  
象也守桃掌其遺衣服若將祭祀則各以其服授尸

### 旅酬禮

曾子問曰祭如之何則不行旅酬之事矣孔子曰聞之小祥者  
主人練祭而不旅奠酬于賓：弗舉禮也昔者魯昭公練而舉  
酬行旅非禮也孝公大祥奠酬弗舉亦非禮也

按朱子謂旅衆也酬導飲也旅酬之禮賓弟子兄弟之子各  
舉觶于其長而衆相酬蓋宗廟之中以有事為榮故逮及賤  
者使亦得以伸其敬也

經禮補逸卷之三

吉禮

祭先帝禮

祭法夫聖王之制祭祀也法施于民則祀之以死勤事則祀之以勞定國則祀之能禦大災則祀之能捍大患則祀之帝嚳能序星辰以著衆堯能賞均刑法以義終舜勤衆事而野死鯀彰洪水而殛死禹能修絲之功黃帝正名百物以明民共財顓頊能修之契為司徒而民成冥勤其官而水死湯以寬治民而除其虐文王以文治武王以武功去民之菑此皆有功烈于民者也非此族也不在祀典

按著衆謂使民與事知體作之期也賞善謂禪舜封禹稷等也能刑謂去四凶

義終謂既禫二十八載乃死也野死謂征有苗死于蒼梧也殯死謂不能成其功也明民謂死之衣服有章也民成謂知五教之禮也冥契六世孫也虐菑謂桀紂烈業也族猶類也

### 釋奠禮

文王世子凡學春官釋奠于其先師秋冬亦如之凡始立學者必釋奠于先聖先師及行事必以幣凡釋奠者必有合也有國故則否凡大合樂必遂養老天子視學大昕鼓徵所以警眾也眾至然後天子至乃命有司行事興秩節祭先師先聖焉有司事卒反命始之養也適東序釋奠于先王制曰出征執有罪反釋奠于學

### 釋菜奠

大胥春入學舍菜合舞秋頒學合聲月令仲春上下命樂正習舞釋菜天子乃帥三公九卿諸侯大夫親往視之學記大學始教皮弁祭菜

愚按禮有釋奠釋菜孔穎達正義辨之詳矣周禮春官大胥職云舍菜文王世子云釋奠及行事必以幣則是舍菜以蘋藻釋奠以牲幣豈禮有輕重乎古者士見于君以雉為摯見于師以菜以摯故釋菜用于大學始教之時用于入學習舞之際用于立學興罷之後皆專為先聖先師之祭此其僅見于學宮政所以師事之也至若古之釋奠施于學者雖曰始立學者以之出征師還以之四時詩書禮樂之官皆以之然

或施之社廟施之祖禰大祝甸祝皆得而用不專于先聖先師而止此其其雜見于群祀乃所以神事之也是則釋奠禮固而釋菜禮寔專焉苟徒舉釋奠而廢釋菜是使尊禮先聖先師之特祀與群祀等耳爰禮者可無辨哉

祭樂祖禮

大司樂凡有道者有德者使教焉死則以為樂祖祭于瞽宗祭義祀先賢于西學

祭先農禮

詩甫田琴瑟擊鼓以御田祖以祈甘雨以介我稷黍田祖先農也豐年多黍多稌止降福孔皆謂秋冬大田田畷至喜耒方禮祀以

其黑騂與其黍稷以享以祀以介景福

祭燿禮

司燿掌行火之政令凡祭祀則祭燿

愚按祭燿禮如祭燹謂祭祀先出火之人以報其為明之功也然則有功于民者觀于此族必舉則先王制禮委曲詳備者益可見矣

禮器孔子曰臧文仲安知禮燔柴於與者與當為燹字之誤夫與者老婦之祭也成于盆尊于瓶

祭先卜禮

龜人上春釁龜祭祀先卜

祭司民司祿禮

司民人三年大比以萬民之數詔司寇司寇及孟冬祀司民之日獻其數于王；拜受之登于天府小司寇孟冬祀司民獻民數于王；拜受之天府若祭天之司民司祿而獻民數穀數則受而藏之

大蜡禮

玉藻大蜡天子之祭也齋章國祭蜡則飲豳頌擊土鼓以息老物黨正國索鬼神而祭祀則以禮屬民而飲酒于序以正齒位郊特牲天子大蜡八主先嗇而祭司嗇祭百種以報嗇饗農及郵表畷禽獸迎猫迎虎祭坊與水庸歲十二月合聚萬物而索

享之也祝辭曰土反其水宅歸其壑昆蟲無作草木歸其宅皮弁素服葛帶榛杖黃衣黃冠而祭大羅氏天子之掌鳥獸者也諸侯貢屬烏草笠而至羅氏致鹿與女而詔客告也以戒諸侯曰好田好女者亡其國天子樹瓜華不斂藏之種也八蜡以記四方四方年不順成八蜡不通以謹民財也順成之方其蜡乃通以移民也既蜡而牧民息已故既蜡君子不與功禮運昔者仲尼與于蜡賓事畢出遊于觀之上喟然而嘆仲尼之嘆蓋嘆魯也言偃在側曰君子何嘆孔子曰大道之行也與三代之英丘未之逮也而有志焉

類禮

大祝掌六祈以同鬼神示一曰類詛祝掌類造之祝號小宗伯類社稷宗廟則為位男巫授號旁招以茅王制類乎上帝詩栢講武類禡也桓武王保有厥士止於昭于天皇以問之

### 造禮

大祝二曰造大會同造于廟詛祝掌類造之祝號男巫授號旁招以茅詛祝所授類造攻說檜崇之神號男巫為之招王制天子將出造乎禰諸侯將出造乎禰

### 檜禮

大祝三曰檜詛祝掌檜禳之祝號男巫授號旁招以茅女祝掌以時招梗檜禳之事以除疾殃凡以神仕者以冬至致天神

人鬼夏日至致地示物鬼以檜國之凶荒民之札天

### 禳禮

大祝四曰禳詛祝掌禳禱之祝號男巫授號旁招以茅肆師若國有大故則令國人祭剪氏掌除蠹物以攻禳攻之黨正四時之孟月吉日則屬民而讀邦法以糾戒之春秋祭禳亦如之春秋傳昭公元年鄭子產曰山川之神則水旱癘疫之灾于是乎禳之日月星辰之神則霜雪風雨之不時于是乎禳之哀公六年有雲如衆赤鳥夾日以飛楚子使問諸周太史周太史曰其當王身乎若禳之可移之于令尹司馬王曰除腹心之疾而寘之股肱何益遂弗禳



愚按大祝六祈之中四曰禋此禋之有定名也魯人鉅室之共而曰禋門此禋之有定所也魯之春秋傳曰山川之神則水旱癘疫之灾于是乎禋之日月星辰之神則雪霜風雨之不時于是乎禋之即此又見禋之無定時也至若春秋僖公二十五年秋大水鼓用牲于門三傳未始明以禋釋之及鄭氏釋周禮乃援是為證安知春秋本文果為禋祭否乎蓋禋之為言崇也初無祠宇壇壝特為綿蕝崇域而祭之耳然此所謂門不過祭于國門之外耳非若祭法所謂祭國門典于七祀之一者也學者察焉

### 攻禮

大祝五曰攻詛祝掌攻說之祝號男巫授號旁招以茅

### 說禮

大祝六曰說詛祝掌攻說之祝號男巫授號旁招以茅庶氏掌除毒蠹以攻說檜之

### 禱祠禮

小祝掌禱祠之祝號以祈福祥順豐年送時雨寧風旱彌灾兵遠臯疾女祝掌凡內禱祠之事小宗伯大裁及執事禱祠于上下神示軍後田後之禱祠肄儀為位都宗人國有大故則令禱祠既祭反命于國曲禮曰禱祠祭祀供給鬼神非禮不誠不莊

### 祭脯禮

族師月吉則屬民而讀邦法春秋祭脯亦如之

愚按大司徒以鄉三物教萬民一曰六德二曰六行三曰六藝卿大夫正月之吉受教法司徒退而頒之于其鄉吏使各以教其所治族師則各掌其戒令政事而于斯讀法之時則察其六行書其孝弟睦姻有學者歲終則會成以待大比是于學者日用飲食之間既無事而非學群居游息之地亦無學而非事至于教養成就德藝之修是皆學術之有統道化之有歸也其所以致人材衆多風俗美盛得無由哉

### 五祀禮

大宗伯以血祭：五祀司服祭五祀則希冕小子掌祈于五祀

按析玄謂或為剗用毛牲日剗：者釁禮之事也剗五祀謂始成其功兆時也司門凡歲時之門受其

餘曲禮天子祭五祀士喪禮疾病行禱五祀則五祀者自天子至于士皆得祭之祭法王為群姓立七祀曰司命曰中雷曰國門曰國行曰泰厲曰戶曰竈王自為立七祀諸侯為國立五祀曰司命曰中雷曰國門曰國行曰公厲諸侯自為立五祀大夫立三祀曰族厲曰門曰行適士立二祀曰門曰行庶人立一祀或立戶或立竈

鄭康成謂天子諸侯大夫祭五祀戶竈門行中雷蓋夏時殷特制也祭法七祀至一祀謂周制也愚按儀法制度貴得兼賤：不得兼貴而諸侯大夫適士祀門行不得戶竈庶士庶

人乃祀戶竈何邪况曾子問篇記天子崩未殯五祀之祭不行既殯而祭則知五祀貴賤通得祭之無疑矣鄭氏凡不可通者皆以為殷周異制似臆度之辭耳且七祀三祀二祀一祀皆不見于儀禮周官今姑缺之又按血祭蓋以陰祀自血起貴氣臭也五祀五邑之帝于王者宮中曰五祀鄭謂此五祀者五官之神在四郊四時迎五行之氣于四郊而祭五德之帝亦食此神焉少昊之子曰重為句芒食于木該為蓐叔食于金修及熙為玄冥食于水顓頊氏之子曰黎為祝融后土食于火土攷之春秋昭公二十九年左傳蔡墨曰五行之官是謂五官寔列受氏姓封為上公祀為貴神社稷五祀是尊是奉木正曰句芒火正曰祝融金正曰蓐叔水正曰玄冥土正曰后土獻子曰社稷五祀誰氏之五官也對曰少皞氏有四叔曰重曰該曰修曰熙寔能金木及水使重為句芒該為蓐叔修及熙為玄冥世不失業遂濟窮桑此其三祀也顓頊氏有子曰黎為祝融共工氏有子曰句龍為后土此其二祀也后土為社稷田正也有烈山氏之子曰柱為稷自夏以上祀之周棄亦為稷自商以來祀之

月令春祀戶祭先脾夏祀竈祭先肺中央祀中雷祭先心秋祀門祭先肝冬祀行祭先腎孟冬臘五祀白虎通祭五祀天子諸侯以牛鄉大夫以羊一說戶以羊竈以雉中雷以豚門以犬井

以豕或曰中雷用牛餘不得用豚并以魚禮運札行于五祀而正法則焉曾子問天子崩未殯五祀之祭不行既殯而祭其祭也尸入三飯不侑醕不酬酢而已矣自啟至于反哭五祀之祭不行已葬而祭祀畢獻而已

按特牲饋食禮祝延尸于奧迎尸而入即延坐三飯告飽祝侑尸：又飯至于九飯畢鄭注士九飯大夫十一飯按此則諸侯十三飯天子十五飯又按特牲禮尸九飯畢主人酌酒侑尸：飲卒爵酢主人主人受酢飲畢酌獻祝：飲畢主人又酌獻佐食天子崩未殯五祀之禮不行者以初崩哀感未遑祭祀雖當五祀祭時不得行既殯而祭者五祀外神不可

以已私喪久廢其祭故既殯哀情稍殺而後祭也其祭也尸入三飯不侑醕不酢而已矣者今喪既殯不得純如吉禮理須宜降殺侑勸也故迎尸入奧之後尸三飯告飽則止祝更不勸侑其食使消常數也自啟至于反哭五祀之祭不得行者謂欲葬之時從啓殯之後葬畢反哭以前靈柩既見哀推更甚故五祀之祭不行已葬而祭者謂已葬反哭殯宮畢而行其祭但既葬謠吉尸入三飯之後祝乃侑尸：食十五故揖主醕尸：飲卒爵而酢揖主揖主飲畢酌而獻祝：受飲畢則止無獻佐食以下之事郊社亦然王制云天地社稷為越紼而行事是與五祀同也郊社有常自啟至反哭當辟此

郊社之日郊社尊故辟其日不使相妨五祀既畢若與啟反  
哭日相值則五祀辟其日也天地社稷去殯處遠祭特違  
越此紼而往赴之故為越紼五祀去殯近暫往則還故不為  
越紼也唯嘗禘宗廟俟吉故王制云喪三年不祭是也

### 祭厲禮

祭法泰厲公厲族厲春秋左傳昭公七年鬼有所歸乃不為厲

### 雉禮

月令季春命國難九門磔攘以畢春氣季冬命有司大難旁磔  
出土牛以送寒氣方相氏帥百隸而時難以索室毆疫郊特牲  
鄉人禘子朝服立于阼存室神也

經禮補逸卷之四

吉禮

天子躬耕禮

月令仲春天子親載耒耜措之于参保介之御間帥三公九卿諸侯大夫躬耕帝籍天子三推三公五推諸侯九推祭義天子為籍千畝冕而朱紘躬秉耒祭統天子親耕于南郊以共齊盛甸師掌帥其屬而耕耨王籍以時入之以共齊盛舍人以歲時縣種稂之種以共王后之春獻種內宰上春詔王后帥六宮之人而生種稂之種而獻之王樂記耕籍然後諸侯知所以敬周語古者大史順時覲土陽瘳憤盈土氣震發農祥辰正月底于

天庙土乃脉發先時九日大史告稷曰自今至于初吉陽氣俱  
烝土膏其動弗震弗渝脉其滿青穀乃不植稷以告王曰史帥  
陽官以命我司事曰踰今九日土其俱動王其祗祓監農不易  
王乃使司徒咸戒公卿百吏庶民司空除壇于籍命農大夫咸  
戒農用先時五日瞽告有協風王至即齊宮百官御事各即其  
齊三日王乃淳濯饗醴及期鬱人薦鬯犧人薦醴王裸鬯饗醴  
乃行百吏庶民畢從及籍后稷監之膳夫農正陳籍禮大史贊  
王之敬從之王耕一墾班三之庶人終于千畝其后稷省功大  
史監之司徒省民大師監之

愚按易繫傳曰包犧氏沒神農氏作斲木為耜揉木為耒：

耨之利以教天下蓋取諸益：卦之象震動之于內巽順于外  
聖人象其物宜立其成器以為天下利維其動而順所以有益  
于民生也後世聖人親載耒耜躬耕之礼盖亦得于教耕利  
益之義不忘本始之意也

### 諸侯躬耕礼

祭義曰諸侯為籍百畝冕而青絃躬秉耒祭法諸侯耕于東郊  
亦以共齊盛

### 后妃親蠶礼

內宰上春詔后帥外內命婦始蠶于北郊以為祭服祭統曰王  
后蠶于北郊以供純服月令季春后妃齊戒親東向躬桑禁婦

女毋觀省婦使以勸蠶事

夫人親蠶禮

祭統曰夫人蠶于北郊以供冕服祭義古者天子諸侯必有公桑蠶室近川而為之築宮仞有三尺棘墻而外閉之及大昕之朝君皮弁素積卜三宮之夫人世婦之吉者使入蠶于蠶室奉種于浴川桑于公桑風戾以食之歲既單矣世婦卒蠶奉繭以示于君遂獻繭于夫人夫人曰此所以為君服與遂副禘而受之因少牢以禮之

祈年禮

籥章凡國祈年于田祖歆豷雅擊土鼓以樂田畷月令祈来年于天宗詩雲漢篇祈年孔風

祈麥禮

月令季春乃為麥祈寔孟冬乃祈来年于天宗大割祀于公社及門閭臘先祖五祀勞農以休息之

祈蠶禮

月令孟春之月天子乃薦鞠衣于先帝

按陳氏謂鞠衣后服也后服此帥外內命服而蠶薦之于神告將服之以蠶也將耕祈穀于上帝所以祈有秋將蠶荐鞠衣于先帝所以祈有春鞠衣謂黃桑之服先帝太皞之屬此為將蠶求福祥之助也



王居明堂禮

月令孟春之月天子居青陽左个青陽左个大仲春之月天子居青陽大廟青陽大廟東季春之月天子居青陽右个青陽右偏南孟夏之月天子居明堂左个明堂左个大仲夏之月天子居明堂大廟明堂大廟南季夏之月天子居明堂右个明堂右个大中央土天子居太廟大室大廟大室中央室也孟秋之月天子居總章左个總章左个大仲秋之月天子居總章大廟總章大廟西季秋之月天子居總章右个總章右个大孟冬之月天子居玄堂左个玄堂左个大仲冬之月天子居玄堂大廟玄堂大廟北季冬之月天子居玄堂右个玄堂右个大太史閏月詔王居門終月闔門

左扉立于門中 玉藻

愚按明堂九室如井田之制蓋本河圖之位也帝出乎震：東方也于時為春陽其于色也為青故春堂名曰青陽以木德王也相見乎離：者明也聖人南向而聽天下嚮明而治故夏堂名曰明堂以火德王也說言乎兌：正秋也萬物總聚相錯而成文章故秋堂名之以金德王也勞乎坎：正北方也其色玄萬物之所歸也故冬堂名之以水德王也左右之堂名个以其介于四隅也中央堂曰大廟大室猶河圖之中宮也四季十八日天子居焉以土德王也蓋以其為大饗之所故曰大廟然祭帝必于明堂者帝出震而宰萬物是萬

物成形于帝也饗帝而以父配之以人成形于父也故季秋成物之時大饗于是烏至堂之覆以茅上園下方此法天地之象也宜有四戶八牖摠之為三十六戶七十二牖是倍河圖之數而各虛其一為中宮又與四時節候之氣數各有合也然則聖人制器尚象動可為憲於此推之可見矣。又按月令載四時天子服器居處各異鄭康成指為秦呂不韋作蓋以篇中有謂大尉百縣三代無之且以季秋受來歲之朔則建亥為秦正遂始信之而不究其為何代之書也然以參夷赭衣之世豈知孟春之布德焚書滅學之時豈知仲春之舍菜此非秦制朋矣攷之始皇二十六年併天下方以十月為歲首而不韋已死于十二年則其誤亦可徵矣要之太尉之官郡縣之制漢實因之布德之詔舍菜之典漢寔有之以季秋受朔為正則太初曆未作之前漢儒作此書以記時王之政事或然也而謂呂作初奚據哉因并釋之

### 天子告朔禮

玉藻天子聽朔于南門之外閏月則闔門左扉立于其中大史頒告朔于邦國閏月詔王居門終月

### 諸侯告朔禮

玉藻諸侯皮弁以聽朔于大廟春秋文公六年禮諸侯受十二月朔政于天子藏于祖廟每月朔朝廟使大夫南面奉天子命

君北面而受之受于廟者孝子歸美先君不敢自專也論語子貢欲去告朔之餼羊子曰賜也爾愛其羊我愛其禮

### 書雲禮

保章氏以五雲之物辨吉凶水旱降豐荒之祲象春秋公羊傳禮天子有靈臺以候天地諸侯有時臺以候四時詩大雅靈臺篇經始靈臺經之營之左傳春王正月辛亥朔日南至公既視朔而從遂登觀臺以望而書禮也凡分至啟閉必書雲物為備故也

### 開冰禮

凌人正歲十有二月令斬冰三其凌春始治鑑夏頒冰掌事月令仲春天子鮮羔開冰春秋昭公四年傳曰古者日在北陸而藏冰西陸朝覲而出之其藏之也深山窮谷回陰沍寒于是乎取之其出之也朝之祿位賓食喪祭于是乎用之其藏之也黑牡秬黍以饗司寒其出之也桃弧棘矢以除其灾其出入也時食肉之祿冰皆與焉大夫命婦喪浴用水祭寒而藏之獻羔而啟之公始用之火出而畢賦自命夫命婦至于老疾無不受水山人取之縣人傳之輿人納之隸人藏之豳風二之日鑿冰冲冲三之日納于凌陰四之日其蚤獻羔祭韭

愚按鑿冰之說見于豳風七月陳正業之詩然自一至四繫以日自四至十繫以月論者謂言月為夏正言日為周正是

則一詩之中兼言二正卒有未通愚意是詩必作于公劉居  
豳之日其後周公遭變故陳后稷先公風化之所由致王業  
之艱難特因其已成之詩以陳之如箕子陳禹之洪範九疇  
是也向使此詩作于周公則將與召公篤公刘詩言豳俗之  
事者皆係之雅而不係之豳矣證此則作于公劉居豳之日  
而豳固本有是歌不足疑也使作于公劉居豳之日則當夏  
之時用夏之正明矣又何周正之疑哉要之以月繫者其序  
以曆而論以日言者其數以陽而論一者為一陽之月二  
之日者二之陽月三之日四之日者三陽四陽之月彼以月  
言者則皆群陰用事之月也四月六陽而又以月言者陽極  
則陰生已近乎陰之月也陰以月言陽以日言正猶係傳雜  
卦始乾終夬以見聖人崇陽抑陰之微意詩人之旨亦猶是  
也况首章于一之日三之日之下三之日四之日之上直問  
以何以卒歲之說是則二之日為此歲之終三之日為次歲  
之始且四之日獻羔祭韭與月令仲春鮮羔開冰之說合其  
事以夏正言者為益信矣因通釋之

經禮補逸卷之五

凶禮

大喪禮

周禮大宰大喪替贈玉含玉典瑞大喪共飯玉含玉贈玉小宰以法掌朝覲會同賓客之戒具喪荒亦如之令百官府共其財用喪荒受其含祔幣玉之事宰夫大喪小喪掌小官之戒命帥執事而治之膳夫大喪則不舉宮正大喪則授廬舍辨其親疎貴賤之居庖人共喪紀之庶羞甸師喪事代王受青莝獸人凡喪紀共其死獸生獸獻人凡喪紀共其魚之鱗菟腊人凡喪紀共其脯腊凡乾肉之事凌人大喪共夷槃冰圉人喪紀共其生

獸死獸之物幕人大喪共其帷幕帶綬掌次凡喪王則張帶三重司裘大喪厥裘飾皮車外府凡喪紀共其財用之幣齋內暨凡喪事佐后使治外內命婦正其服位內小臣喪紀則擯詔后之禮事相九嬪之禮事正內人之禮事閭人喪紀之事設門燎蹕宮門廟門寺人若表紀則帥女宮而致于有司佐世婦治禮事掌內人之禁令內暨若喪紀之事則為內人蹕九嬪若有賓客則從后大喪師叙哭者亦如之女御大喪掌沐浴夏采掌大喪以冕服復于太祖以乘車建綬復于四郊王府大喪共舍玉復衣裳角枕角柶典絲喪紀共其絲纊組文之物大司徒大喪帥六卿之衆庶扃其六引而治其政令若國有大故則致萬民于玉門小司徒大喪帥邦後治其政教鄉師大喪用後則帥其民而至遂治之及葬執蠹以與匠師匱四治後及窆執斧以涖匠師族共喪器鄉共吉凶禮樂之器鄉大夫國有大故則令民各守其閭以待政令封人喪紀則飾其牛牲鼓人大喪則詔大僕鼓牛人喪事共其真牛遂人大喪帥六遂之後而致之掌其政令及葬帥而扃六綽及窆陳後遂師大喪使帥其扃以帷帶先道野後及窆抱磨共丘籠及蜃車之後鄮長喪紀之事若作其民而用之則以旗鼓兵革帥而至稍人大喪帥蜃車與其後以至掌其政令以聽于司徒舍人喪紀共飯米爇穀大宗伯朝覲會同則為上相大喪亦如之小宗伯王崩大肆以秬鬯泝及

執大斂小斂帥異族而佐縣哀冠之式于路門之外及執事眠  
奠獻器遂哭之卜奠兆甫窆亦如之既奠詔相喪祭之禮成奠  
而祭墓為位肆師大奠大泐以鬯則令外內命婦序哭摯鬱人大  
喪之泐共其肆器及奠共其裸器遂狸之鬯人大喪之大泐設  
斗共其鬯鬯司尊彝大喪存奠彝天府凡國之玉鎮大寶器  
藏焉若有大喪則出而陳之既事藏之司服為天王斬喪大喪  
共其復衣服斂衣服奠衣服厥衣服皆掌其陳序世婦大喪比  
外內命婦之朝尊哭不敬者而苛罰之內宗大喪序哭者外宗  
大喪則序外內朝奠哭者家人大喪既有日請度甫窆遂為之  
師及窆以度為丘隧共喪之寔器及奠言駕車象人及窆寔執  
斧以泣遂人藏凶器大司樂大喪泐樂器及奠藏樂器亦如  
之大師大喪師瞽而斂作匱謚小師大喪與斂眡瞭大喪斂樂  
器笙師大喪斂其樂器及奠奉而藏之鑄師大喪斂其樂器奉  
而藏之簫師大喪斂其樂器奉而藏之典庸器大喪斂筍簋司  
于大喪斂舞器及奠奉而藏之大祝大喪始崩以肆鬯泐尸相  
飯贊斂徹奠小祝大喪贊泐設熬置銘及奠設道齋之奠分禱  
五祀喪祝掌大喪勸防之事及辟令啟及朝御匱乃奠及祖飾  
棺乃載遂御及奠御匱出宮乃代及壙說載除飾大史大喪執  
法以泣勸防小史大喪佐大史凡國事之用禮法者掌其小事  
中車大喪飾遣車及奠執蓋從車持旌及墓疇啟闕陳車路典

大喪則出路贊駕說車僕大喪斂草車司常大喪共銘旌建廠  
車之旌及葬亦如之大司馬大喪平士大夫喪祭財人大喪與  
僕人遷尸委人喪紀共其薪蒸木材諸子大喪正群子之服位  
虎賁氏大喪守王門及葬從遣車而哭方相氏掌蒙熊皮黃金  
四目玄衣朱裳執干楊楯大喪先匱及墓入壙以干擊四隅歐  
方良大僕大喪始崩戒鼓傳達于四方寔亦如之祭僕大喪復  
于小廟御僕大喪持翬隸僕大喪復于小寢大寢司兵大喪斂  
五兵司弓矢大喪共明弓矢校人大喪飾遣車之馬及葬埋之  
澤虞喪紀共其葦蒲之事稻人喪紀共其葦事大司寇大喪前  
王士師大師則帥其屬而蹕而王宮大行人若有大喪則詔相  
諸侯之禮鄉士大喪則各掌其鄉之禁令帥其屬夾道而蹕象  
胥大喪相國客之禮儀而正其位檀弓哭泣之哀齊斬之情饘  
粥之食自天子達

后喪禮

司服凡喪為王后齊衰內司服后之喪共其衣服凡內具之物  
小宰令百官府共其財用受其含槨幣玉之事內小臣喪紀相  
九嬪之禮事正內人之禮事寺人若喪紀則帥女宮而致于有  
司佐世婦治禮事掌內人之禁令舍人喪紀共飯米熬穀庖人  
共喪紀之庶羞腊人喪紀共其脯腊凡乾肉之事典絲枲紀共  
其絲枲組文之物女御后之喪持翬小司寇后之喪前王而辟



內豎之王后之喪遷于宮中則前蹕檀弓穆公之母卒使人問于曾子曰如之何對曰申也聞諸申之父曰哭泣之哀齊衰之情饘粥之食自天子達

### 世子喪禮

小司寇凡世子之喪前王而辟

### 職喪禮

職喪掌諸侯之喪及卿大夫士凡有爵者之喪以國之喪禮泣其禁令序其事凡其喪祭詔其號治其禮外其寵凡小喪紀陳其鼎俎而寔之幕人三公及卿大夫之喪共其帟鄉士三公若有邦事則為之前驅而辟其表亦如之遂士六鄉若有邦事則為之前驅而畢其喪亦如之雜紀復諸侯以襲衣冕服爵弁服諸侯行而死于館則其服如于其國如于道則升其乘車之左轂以其綏復諸侯飯七貝公七踊公襲卷衣玄端一朝服一素積一纁裳一爵弁二玄冕一襲衣一朱綠帶申加大帶于上諸侯五月而葬七月而卒哭升正柩諸侯執紼五百人四紼皆嚙枚司馬執鐸左八人右八人匠人執羽葆御柩檀弓哭泣之哀齊斬之情饘粥之食自天子達

### 夫人喪禮

雜記復夫人稅冢衣揄搖狄：稅素沙下大夫以檀衣謂下大夫夫之喪大記士妻以稅衣

## 大夫喪禮

職喪掌卿大夫士凡有爵者之喪以國之喪禮准其禁令序其事凡其喪祭詔其號治其禮雜記復下大夫以檀衣其餘如士大夫士死于道則升其乘車之左轂以其綬復如于館死則其復如于家為君使而死公館復私館復不復大夫飯五貝大夫五踊喪大記大夫之喪三日之朝既殯主人主婦室老皆杖雜記大夫大喪大宗人相小宗人命龜卜人作龜大夫之喪其升正柩也執引者三百人執鐸者左右各四人御柩以茅大夫三月而葬五月而卒哭卿大夫之疾君問之無筭君于卿大夫比葬不食肉比卒哭不舉樂檀弓公叔文子卒其子成請謚于君檀弓齊莊公襲莒于奪元杞梁死為其妻迎其柩于路而哭之哀莊公使人弔之春秋左傳襄公十七年齊晏嬰麤縗斬首經帶杖菅屨食粥居倚廬寢苫枕草其老曰非大夫之禮也曰唯卿為大夫

### 內子喪禮

雜記復內子以鞠衣衰衣素紗

### 復禮

曲禮復曰天子復矣檀弓君復于小寢大寢小祖大祖庫門四郊禮運及其死也升屋而號告曰臯某復然後飯腥而苴孰檀弓復盡愛之道也有禱祠之心為望反諸幽求諸鬼神之道也

北面求諸幽之義也喪大記凡復男子稱名婦人稱字復聲必三者禮成于三也唯哭先復而後行死事

### 承衾哭尸禮

喪大記大夫之喪主人坐于東方主婦坐于西方其有命夫命婦則坐無則皆立士之喪主人父兄子姓皆坐于東方主婦姑姊妹子姓皆坐于西方凡哭尸于室者主人二手承衾而哭

### 主喪禮

大喪記有無後無主雜記姑姊妹其夫死而夫黨無兄弟使夫之族人主喪妻之黨雖親弗主夫若無族則前後家東西家無有則里尸主之凡主兄弟之喪雖踈亦虞之

### 沐浴尸禮

大稅大喪始崩以肆盥溺尸小祝贊溺喪大記始死遷尸于床撫用歛衾去死衣小臣楔齒用柶綴足用燕几管人汲不說緇屈之盡階不升堂授御者入浴小臣四人抗衾御者二人浴水用盆沃水用柶浴用絺中拒用浴衣如他日小臣爪足沐餘水弃于坎其母之喪則內御者抗衾而浴管人汲授御者御者差沐于堂上君沐梁大夫沐稷士沐梁甸人為篋于西墻下陶人出重鬲管人受沐乃煮之甸人取所徹廟之西北扉薪用爨之管人授御者沐乃沐用瓦盤拒用中如他日小臣爪手翦須濡濯弃于坎

## 奠尸禮

司服大喪共其奠衣服士喪禮服者降楔齒綴即奠脯醢典酒于尸東

愚按檀弓小斂之奠子游曰于東方曾子曰于西方魯禮之末失也又按儀矣記禮者正之曰小斂之奠在西方魯禮之末失也又按儀禮小斂奠無席大斂則有奠席在饌此據此則小斂亦并無席矣然小斂之奠設于東方者蓋以萬物生于東而死于北孝子即此設奠依神為未忍死其親之意也

## 襲斂禮

司服大喪共其斂衣服皆掌其陳序雜記子羔之襲也繭衣裳與稅衣纁衽為一素端一皮弁一爵弁一玄冕一公襲卷衣一玄端一朝服一素積一纁裳一爵弁二玄冕二襲衣一朱綠帶申加大帶于上君錦冒黼殺綴旁七大夫玄冒黼殺綴旁五士緇冒黼殺綴旁三喪大記小斂君錦衾大夫緇衾士緇衾皆一衾十有九稱大斂君陳衣百稱大夫五十稱士三十稱檀弓子思曰凡附于身者必誠必信勿之有悔焉耳矣

愚按古之葬者厚衣之以薪葬之中野後世聖人易之以棺槨蓋取諸大過然聖人制為典禮豈直棺槨過于厚哉則凡含槨暋賻之禮衣裳紼紼之具亦必厚稱其制也故古者士襲衣三稱大夫五稱諸侯七稱公九稱小斂尊畢通用十九

稱大斂君百稱大夫五十稱士三十稱若孔子之喪公西赤  
掌殯葬烏襲衣十一稱朝服一雖其襲數不同而所以欲厚  
庇之者非徒設飾也蓋以死者辟人之惡而凡保附其體者  
大抵不容踈略也降及後世僅有襲衣而大小斂之禮不行  
故槨禮亦從而廢彼薄視其親如司馬溫公之訖者豈少哉  
君子有不忍言也然則孝子之心如之何曰稱其有無之寔  
盡其孝敬之誠斯可矣

### 小斂禮

大祝大喪贊斂喪祝凡卿大夫之喪掌事而斂喪大紀小斂主  
人即位于戶內君以篔簹席大夫以蒲席士以葦席小斂布絞縮  
者一橫者三君錦衾大夫縞衾士緇衾皆一衾十有九稱君陳  
衣于東序大夫士陳衣于房中皆西頰北上絞紛不在列主人  
即位于戶內主婦東向乃斂卒斂主人馮之踊主婦亦如之主  
人袒說髦括髦亦麻婦人髻帶麻于房中徹帷男女奉尸夷于  
堂降拜檀弓主人既小斂袒括髮曾子曰尸未設飾故惟堂小  
斂而徹帷雜記小斂大斂啟皆辨編拜小斂環經公大夫士一  
也

### 大斂禮

司服大喪共其斂衣服皆掌其陳序大祝贊斂喪祝凡卿大夫  
之喪掌事而斂檀弓大斂于阼喪大記大斂布絞縮者三橫者

五布紵二衾君大夫士一也君陳衣于庭百衽北領西上大夫  
陳衣于東序五十衽西領南上士陳衣于序東三十衽西領南  
上紵紵如朝服紵一幅為三不辟紵五幅無純君大夫士祭服  
無筭君褶衣褶衾大夫士猶小斂也君將大斂于弁經即位于  
序端卿大夫即位于堂廉楹西北向東上父兄堂下北向夫人  
命婦尸西東面向外宗房中南面向小臣鋪席商祝鋪紵紵衾衣士  
盥于盤上士舉遷尸于斂上卒斂宰告于馮之踊夫人東面向亦  
如之雜記公視大斂公升商祝鋪席乃斂大斂皆辨拜

### 殯禮

王制天子七日而殯諸侯五日而殯大夫士庶士人三日而殯  
檀弓天子之殯也敢塗龍輅春以樽加斧于樽上畢塗屋喪大  
記君殯用輅轎至于上畢塗屋大夫殯以幬轎于至西序塗于  
暨于棺士殯見衽塗上帷之檀弓殯于客位既殯旬而布材典  
明器雜記朝夕哭不惟

### 訃禮

雜記凡訃于其君曰君之臣某死父母妻長子曰君之臣某之  
某死君訃于他國之君曰寡君不祿敢告于執事夫人曰寡小  
君不祿天子之喪曰寡君之適子某死大夫訃于同國適者曰  
某不祿訃于士亦曰某不祿訃于他國之君曰君之外臣寡大  
夫某死訃于適者曰吾子之外私寡大夫某不祿使其寔訃于

士亦曰某死訃于他國之君曰君之外臣某死訃于大夫曰吾子之外私某死訃于士亦曰君吾子之外私某死

### 弔禮

鬯人凡王弔臨共介鬯大僕掌三公孤卿之弔勞內宗凡卿大夫之喪掌其弔臨小臣掌士大夫之弔勞御僕掌庶民之弔勞司巫王弔則典祝前喪祝王弔則典巫前寺人凡內人弔臨于外則帥而往立于其前而詔相之宰夫凡邦之弔事掌其戒令典其幣器財用凡所共者司服凡弔事弁經王制諸侯弔于異國之臣則其君為主檀弓君子大夫將葬弔于宮檀弓君過柩於路必使人弔之檀弓喪公弔之必有拜者雖朋友州里舍人可也雜記弔者即位于門西東向其介在其東南北面西上西于門主孤西面相者受命曰孤某使其請事客曰寡君使其如何不淑相者入告出曰孤某須矣弔者入主人升堂西面弔者升自西階東面致命曰寡君聞君之喪寡君使其如何不淑子拜稽顙弔者曰降反位春秋左傳襄公二十三年齊侯龍宮：子伐之獲杞梁齊侯歸遇杞梁之妻于郊使人弔之辭曰殖之有罪何辱命焉若免于罪則猶有先人之奠廬在下妾不得典郊弔齊侯弔諸其室昭公七年衛襄公卒王使成簡公如衛弔九年王有姻喪晉使趙成如周弔

### 臨禮

鬯人凡王弔臨共介鬯大宗伯朝覲會同則為上相王哭諸侯亦如之內宗凡卿大夫之喪掌其弔臨寺人凡內人弔臨于外則帥而往立于外而詔相之雜記上客臨曰寡君有宗廟之事不得承事使一介老其相執綽相者反命曰孤須臾臨者入門右介者皆從之立于其左東上宗人納賓升受命于君降曰孤敢辭吾子之辱請吾子之復位客對曰寡君命其毋敢視賓客敢辭宗人反命曰孤敢固辭吾子之辱請吾子之復位客對曰寡君命其毋敢視賓客敢固辭吾子之辱請吾子之復位客對曰寡君命使臣其毋敢視賓客是以敢固辭固辭不獲命敢不敬從客立于門西介立于其左東上孤降自阼階拜之升哭與客拾踊三客出送于門外拜稽顙曲禮入臨不翔檀弓天子之哭諸侯也爵弁經紵衣陳莊子死赴于魯魯人欲勿哭繆公召縣子而問焉縣子曰古之大夫束脩之間不出竟雖欲哭之安得而哭之今之大夫交政于中國雖欲勿哭烏得而弗哭且臣聞之哭有二道有愛而哭之有畏而哭之公曰然則如之何而可縣子曰請哭諸異姓之廟于是典哭諸縣氏妻之昆弟為父後者死哭之適室父在哭于妻之室非為父後者哭諸異室有殯聞遠兄弟之喪哭于側室無側室哭于門內之右同國則往哭之春秋左傳襄公十二年吳子壽夢卒臨于周廟禮也凡諸侯之喪異姓臨于外同姓于宗廟同宗



於祖廟同族于禰廟是故魯為諸姬臨于周廟為邢凡蔣茅胙  
祭臨于周公之廟盟于臯鼫鄭子大叔未至而卒晉趙簡子為  
之臨甚哀

### 含禮

職喪凡國有司以王命有事焉則詔贊大人有事謂含槨贈賵之事小宰  
喪荒受其含槨幣玉之事雜記含者執璧將命曰寡君使其含  
相者入告出曰孤某領矣含者入升堂致命于拜稽顙含者坐  
委于殯東南有葦席既葬蒲席降出反位宰夫朝服即喪屨升  
自西階西向坐取璧降自西階以東檀弓邾婁考公之喪徐君  
使容居來舍穀梁傳貝玉曰含左傳文公五年王使榮叔來含  
且賵檀弓飯用米貝弗忍虛也不以食道用美焉耳

愚按含者何口實也寔者何寔以玉食之美也玉食者何天  
子飯以玉諸侯以珠大夫以碧士以貝庶人以錢是也然則  
何以寔以之孝子事死如生不忍虛其親口之意也他日塗  
車芻靈之制亦猶是也不忘之心也夫安得不敬乎攷之雜  
記天子飯九貝諸侯七大夫五士三周禮天子飯含用玉此  
蓋異代之制不同如此本注謂飯含也是即以飯為含矣參  
之禮運曰飯腥穀梁氏謂貝玉曰含則二者雖皆為口寔而  
用則不同謂之飯含則可謂之飯含也則不可學者察焉

### 賵賵禮

職喪掌諸侯之喪凡國有司以王命有事焉則詔替主人有事謂贈

事雜記上介賜執珪將命曰寡君使其賜相者入告反命曰

孤須矣陳秉黃大路于中庭北軒執圭將命客使自下由路西

子拜稽顙坐委于殯東南隅宰舉以東凡將命鄉殯將命子拜

稽顙西南而坐委之宰執璧典珪宰夫舉榭升自西階西面坐

取之降自西階賜者出反位于門外少儀臣為君喪納貨貝于

君則曰納甸于有司賜不入廟門賻焉與其幣不入廟門賻者

致既命坐委之擯者舉之主人無親受也雜記魯人之贈也三

玄三纁廣尺長終幅公羊傳春秋隱公元年天王使宰咺來歸

惠公仲子之賜三年武氏子來求賻文公五年王使榮叔歸含

且賜公羊傳車馬曰賻貨財曰賻

且賜公羊傳車馬曰賻貨財曰賻

### 榭禮

小宰喪荒受其含榭幣玉之事雜記諸侯相榭以後路典冕服

榭者曰寡君使其榭相者入告曰孤某須矣榭者執冕服左執

領右執要入升堂致命曰寡君使其榭子拜稽顙委衣于殯東

榭者降受爵弁服于門內雷將命子拜稽顙如初受皮弁服于

中庭自西階受朝服自堂受玄端將命子拜稽顙皆如初榭

者降出反位宰夫五人舉以東降自西階其舉亦西面少儀臣

致榭于君則曰致廢衣于賈人春秋左傳襄公二十八年如公

楚、康王卒二十九年春王正月公在楚、人使公親榭文公

九年秦人來歸僖公成風之榘定公九年齊侯伐晉夷儀敝無存死于雷下得其尸公三榘之公羊傳衣被曰榘

### 聞喪禮

曾子問諸侯祭社稷俎豆既成聞天子崩后之喪君薨夫人之喪孔子曰廢春秋昭公十五年公羊傳公有事于廟聞大夫之喪去樂卒事大夫聞君之喪攝王以往大夫聞大夫之喪尸事畢而往雜記聞兄弟之喪大功以上見喪之鄉而哭

### 奔喪禮

禮奔父母之喪見星而行見星而舍過國至竟哭盡哀而止哭辟市朝望其國竟哭至于家入門左升自西階殯東西面坐哭盡哀括髮袒降堂東即位西鄉哭成踊襲經于序東絞帶反位奔母之喪西面哭盡哀括髮袒降堂東即位西向哭成踊襲免經于序東不及殯先之墓北面坐哭盡哀成踊盡哀括髮東即主人位經絞帶哭成踊相者告事畢遂冠歸入門左北面哭盡哀括髮袒成踊于又哭括髮成踊于三哭猶括髮成踊三日成服于五哭相者告事畢小記奔父之喪括髮于堂上袒降踊襲經于東方奔母之喪不括髮袒于堂上降踊襲免于東方經即位成踊出門哭止三日而五哭三袒奔兄弟之喪先之墓而後之家為位而哭所知之喪則哭于宮而後之墓齊衰望鄉而哭大功望門而哭小功至門而哭總麻即位而哭通旨諸侯為天

王服斬衰崩則奔喪雜記未服麻而奔喪及主人之未成經也  
疏者典主人皆成之親者終其麻帶經之日數春秋定公十五  
年邾子未奔喪春秋奔喪于是始

### 朝夕奠禮

檀弓朝奠日出夕奠逮日

### 祖祭禮

喪祝及祖飾棺乃載遂御檀弓曰祖於庭

### 喪朝禮

喪祝及朝御柩乃奠檀弓喪之朝也順死者之孝心也其哀離  
其室也故至于祖孝之庙而後行設朝而殯于祖周朝而遂葬

### 遣行禮

大史遣之日讀誅巾車大喪飾遣車大司馬喪祭奉詔馬牲王以馬祭者蓋奠校人大喪飾遣車之馬及葬埋之檀弓國君七介遣車  
七乘大夫五介遣車五乘儀禮商祝拂匱用功布撫用俛衾檀  
弓將行遣而行之

### 道齋禮

小祝及葬設道齋之奠分禱五祀

### 葬禮

喪祝大喪及葬御柩出宮乃代鄉而師大喪及葬執纛以典匠  
師御匱而治後冢人先王之葬居中以昭穆為左右凡諸侯居

左右以前卿大夫士居後各以其族凡有功者居前以爵等為丘封之度典其樹數及窆執斧以泣遂入窆凶器方相氏及墓入壙以干擊四隅歐方良鬯人及窆共其裸器遂狸之枝人大喪飾遣車之馬及窆埋之大司樂大喪泣廡樂器及窆藏樂器亦如之司干大喪廡舞器及窆奉而藏之大喪記君窆用輜四綽二碑御官用羽葆大夫窆用緇二綽二碑御棺用茅土窆用國車二綽無碑比出宮御棺用功布曲禮送窆不辟塗潦春秋左傳隱公元年天子七月而窆同軌畢至諸侯五月同盟至大夫三月同位至士踰月外姻至檀弓子思曰三月而窆凡附于棺者必誠必信勿之有悔焉耳矣

### 墓祭禮

小宗伯成葬而祭墓為位家人凡祭墓為尸

愚按古者自天子諸侯以及大夫士莫不有廟有廟必有主故既葬也則作主而奉主以歸于廟歲時祀之惟庶人無廟則祭之于寢禮無所謂墓祭也後世大夫士家致重墓祭曾不以先王無制而廢之者蓋以墓也者先人體魄之所藏也魂氣必來依焉于是展省而祭之以致其孝敬之誠亦不為非禮也論者具惑于墓祭為尸之文蓋是祭也以初葬日既封為親託體于此以家人為尸別令有司舍奠以禮地神主人先反而視牲日中而虞自是以吉祭易喪祭明日祔而作

主特祀于廟而非常祭于墓之有尸也明矣讀者察焉

### 會葬禮

春秋左傳隱公元年天子七月而葬同執畢至言同執以別四夷之國諸

侯五月同盟至同在大夫三月同位至古者行後不踰時士踰月外

姻至踰月度月也姻猶親也此言赴隱公元年改葬惠公衛侯

來會葬文公元年葬僖公王使內史叔服來會葬文公五年葬

我小君成風王使召伯來會葬襄公二年齊姜薨齊侯使諸姜

宗婦來送葬昭公十五年王穆后崩十二月晉荀躒如周葬穆

后定公十五年葬定公滕子來會葬哀公二十三年宋景公卒

季康子使冉有弔且送葬曰敝邑有社稷之事使肥與有職競

焉是以不得助執紼使求從輿人

### 天子虞禮

檀弓既封主人贈而祝宿虞尸既反哭主人與有司視虞牲有

司以几筵舍奠于墓左反日中而虞葬日虞弗恐一日離也公

羊傳文公二年作主

### 諸侯虞禮

雜記諸侯七虞檀弓虞而立尸有几筵

### 大夫虞禮

雜記曰大夫五虞又曰上大夫之虞也少牢下大夫之虞也植

牲

士虞禮

雜記士三虞儀禮始虞用柔日曰哀子某哀顯相夙興夜處不寧

卒哭禮

檀弓既卒哭宰夫執木鐸以命于宮曰舍故而諱新自寢門至于庫門曲禮卒哭乃諱喪服小記報赴葬者報虞三月而後卒哭雜記士三月卒哭大夫五月而卒哭諸侯七月而卒哭上大夫卒哭大宰下大夫卒哭少宰檀弓是日也以虞易奠卒哭曰成事左傳僖公三十三年凡君薨卒哭而祔

祔禮

檀弓葬日虞是日也以吉祭易喪祭明日祔于祖父殷練而祔周卒哭而祔喪服小記士祔于大夫則易牲士大夫不得祔于諸侯父之為士大夫者其妻祔于諸侯姑妾祔于妾祖姑亡則中一以上而祔：必以其昭穆諸侯不得祔于天子天子諸侯大夫可以祔于士雜記大夫祔于士：不祔于大夫祔于大夫之昆弟無昆弟則從其昭穆雖王父母在亦然婦祔于其夫之所祔之妃無妃則亦從其昭穆之妃妾祔于妾祖姑無妾祖則亦從其昭穆之妾男子祔于王父則配女子祔于王母則不配公子祔于公子春秋左傳僖公三十三年凡君薨卒哭而祔：而作主

### 作主禮

春秋左傳僖公三十三年凡君薨卒哭而祔：而作主特祀于主。烝嘗禘于廟。公羊傳：虞主用柔練，主用栗。何氏注：狀正方，穿長尺二寸，諸侯長一尺，用桑者取其名。所以付孝子之心，栗猶戰栗，謹敬貌。士虞禮曰：桑主不文，吉主皆刻而謚之。蓋為禘祫禘時別昭穆也。

### 小祥禮

士虞禮期而小祥，檀弓曰：練，衣黃裏，緇緣，葛要，經繩屨，無絢，角瑱，鹿裘，衡長祛，楊之可也。雜記自諸侯達諸士，小祥之祭，主人之酌也。齊之衆賓兄弟則皆啐之。

### 大祥禮

士虞禮又期而大祥，檀弓曰：祥而縞，雜記曰：祥主人之除也。於夕為期，朝服，祥日其故服。自諸侯達諸士，小祥之祭，主人之酌也。齊之衆賓兄弟則皆啐之。大祥主人啐之，衆賓兄弟皆飲之。可也。王制三年之喪，自天子達。

### 禫祭禮

士虞禮中月而禫，大喪記禫而從御。吉祭而復寢，閭傳中月而禫，而織無所不佩。檀弓曰：禫徙月，樂。孔子既祥五日，彈琴而不成聲。孟獻子禫縣而不樂。比御而不入。夫子曰：獻子加于人一等矣。

愚按禫而從御，鄭注謂御婦人，杜預謂從政而御，賤事集說。



取杜說近是則非也古者父母之喪居倚廬不塗寢苦枕由  
既葬柱楣塗廬既練堊室既禭黜堊皆不御內及禫而內無  
哭者樂作矣始御內復寢參之孟獻子比御而不入則御為  
婦人之當御而非御職事明矣然則孟獻子禫縣而不樂比  
御而不入夫子曰獻子加于人一等矣夫加于人一等是禮  
過于人矣禮過于人非先王之中制也陳注謂夫子美之恐  
未必然他日伯魚于出母之喪期而猶哭子路有姊之喪弗  
除夫子皆抑其過則過于人一等可正矣

### 並有表禮

曾子問並有喪何先何後孔子曰奠先輕而後重其奠也先重  
而後輕自啟及葬不奠行奠不衰次反奠奠而後辭于殯賓遂  
修葬事其虞也先重而後輕

### 道遇喪禮

檀弓君遇柩于路必使人弔之

### 謚禮

大祝大喪帥瞽而厥作籥謚太史小喪賜謚小史掌御大夫之  
喪賜謚職喪凡其喪祭詔其號治其禮號謂檀弓死謚周道也  
曲禮已孤暴貴不為父作謚檀弓公叔文子卒其子成請謚于  
君曰日月有時將葬矣請所以易其名者君曰昔者衛國凶饑  
夫子為粥與國之饑者是不亦憲乎昔者衛國有難夫子以其

衛寡人不亦貞乎夫子聽衛國之政修其班制以與四鄰交衛國之社稷不辱不亦文乎故謂夫子貞惠文子表記曰先王謚惠耻名之浮于行也

### 誄禮

大祝作六辭曰誄大史遺之日讀誄凡喪事攷焉小史卿大夫之喪讀誄曾子問賤不誄貴幼不誄長禮也唯夫子稱天以誄之諸侯相誄非禮也檀弓魯莊公及宋人戰于乘丘縣賁父御卜國為右馬驚敗績遂死之圉人浴馬有流矢在白肉公曰非其罪也遂誄之士之有誄自此始也春秋左傳哀公十六年孔丘卒公誄之曰昊天不弔不憇遺一老俾屏予一人以在位筑筑予在疚嗚呼哉哀尼父無自律

### 顧命禮

書顧命康王之誥惟四月哉生魄王不懌甲子王乃洮頰水相被冕服憑玉几乃同召大保奭芮伯彤伯畢公衛侯毛公師氏虎臣百尹衛事王曰嗚呼疾大漸惟幾病日臻既彌留恐不獲誓言嗣茲予審訓命汝昔君文王武王宣重光真麗陳教則肄肄不違用克達殷集大命在後之侗敬迓天威嗣守文武大訓無敢或逾今天降疾殆弗興弗悟爾尚明時朕言用敬保元子釗弘濟于艱難柔遠能迓安勸小大庶邦思夫人自亂于威儀爾無以釗冒貢于非幾茲既受命還出綴衣于庭越翼日乙丑

王崩大保命仲桓南宮毛俾爰齊侯呂伋以二千戈虎賁百人  
逆子釗于南門之延入翼室恤宅丁卯命作冊度越七日癸酉  
伯相命士須材狄設黼底綴衣牖間南向敷重篋席黼純華玉  
仍几西序東向敷重底席綴純文貝仍几東序西向敷重豐席  
畫純雕玉仍几西夾南向敷重筍席去純紛漆仍几越玉五重  
陳寶赤刀大訓弘璧琬琰在西序大玉夷玉天球河圖在東序  
衛之舞衣大貝鼗鼓在西房兂之戈和之弓垂之竹矢在東房  
大輅在賓階西綴輅在阼階面先輅在左塾之前次輅在右塾  
之前二人爵弁執惠立于畢門之內四人綦弁執戈上刃夾兩  
階祀一人冕執劉立于東堂一人冕執鉞立于西堂一人冕執  
戣立于東垂一人冕執翟立于西垂一人冕執銳立于側階王  
麻冕黼裳由賓階躋鄉士邦君麻冕蟻裳入即位大保大史大  
宗皆麻冕彤裳大保承介圭上宗奉同瑁由阼階躋大史秉書  
由賓階躋御王冊命曰皇后憑玉几道揚末命、汝嗣訓臨君  
周邦率循大卞燮和天下用荅揚文武之光訓王載拜興答曰  
眇予末小子其能而亂四方以敬忌天威乃受同瑁王三宿  
三祭三啗上宗曰饗大保受同降盥以異同秉章以酢受宗人  
同拜王答拜大保受同祭躋啗授宗人同拜王答拜大保降收  
諸侯出廟門侯王出在應門之內大保率西方諸侯入應門左  
畢公率東方諸侯入應門右皆布秉黃朱賓稱奉圭兼幣曰一

二臣衛敢執壤奠皆載拜稽首王義嗣德答拜大保及芮伯咸  
進相揖皆載拜稽首曰敢敬告天子皇天改大邦殷之命惟周  
文武誕受蒞若克恤土惟維陟王畢協賞罰戡定厥功敷遺後  
人休令王敬之哉張皇六師無壞我高祖寡命王若曰庶邦侯  
甸男衛惟予一人釗報告若君文武丕平富不務咎底至齊信  
用昭明于天下則亦有熊羆之士不二心之臣保乂王家用端  
命于上帝皇天用訓厥道付畀四方乃命建侯樹屏在我後之  
人今予一二伯父尚須暨顧綏爾先公之臣服于先王雖爾身  
在外乃心罔不在王室用奉恤厥若無遺鞠子羞群公既皆聽  
命相揖趨出王釋冕反喪服

經禮補逸卷之五

經禮補逸卷之六

凶禮

凶荒禮

大司徒以荒政十有二聚萬民一曰散利二曰薄征三曰緩刑  
四曰弛力五曰舍禁六曰去幾七曰青禮八曰殺哀九曰蕃樂  
十曰多昏十有一曰索鬼神十有二曰除盜賊士師若邦凶荒  
則以荒辨之法治之令移民通財糾守緩刑朝士若邦凶荒則  
令邦國都家縣鄙慮刑貶遺人掌縣都之委積以待凶荒小宰  
以法掌朝覲會同賓客之戒具喪荒亦如之令百官府共其財  
用喪荒受其含椁幣玉之事膳夫大荒則不舉司服大荒素服

大司樂大荒令弛縣典瑞珎圭以恤凶荒小行人若國凶荒則令調委之廩人掌九穀之數若食不能人二鬴則令邦移民就穀詔王殺邦用掌客凡禮賓客凶荒殺禮司市國凶荒則市無征凡以神仕者以禴國之凶荒曲禮歲凶年穀不登君膳不祭肺馬不食穀馳道不除祭事不縣大夫不食梁士飲酒不樂玉藻年不順成君衣布摺本閔梁不租山澤列而不賦土工不興大夫不得造車馬春秋傳襄公二十四年大侵之禮君食不兼味壹榭不塗弛侯廷道不除百官布而不制鬼神禱而不祀此大侵之禮也王制祭凶年不儉

愚按祭禮豐年不奢凶年不儉此記禮者之言也孔子又曰凶年祀以下牲不同何哉蓋先王之祀制用有常不以歲之豐凶而易其禮此禮之循乎經也祀以下牲如凶年君膳則不舉服則布素樂則弛縣賓客則殺禮而以常祭之牲遞降而用者此又禮之通乎變也然歲有豐凶而禮無奢儉牲有降用而禮無貶損是則未嘗不同也

### 大札禮

大司徒大札則令邦國移民通財舍禁弛力薄征緩刑朝士若札喪則令邦國都家縣鄙慮刑貶膳夫大札則不舉司服大札素服大司樂大札令弛縣司市國札喪則市無征掌客凡禮賓客札喪殺禮凡以神仕者以禴民之札喪小行人若國札喪則

令聘補之均人凶札則無力政無財賦

### 告饑禮

春秋左傳隱公六年京師來告飢

### 請糴禮

春秋左傳隱公六年京師告飢公為之請糴于宋衛齊鄭禮也莊公二十八年臧孫辰告糴于齊僖公十三年晉荐飢使乞糴于秦輸粟于晉

### 歸粟禮

春秋僖公十三年晉荐飢乞糴于秦輸粟于晉十五年晉又飢秦又餼之粟定公五年夏歸粟于蔡以周亟矜無資

### 大裁禮

膳夫大裁則不舉司服大裁素服大司樂大裁令弛縣掌客凡禮賓客禍災殺禮小宗伯大裁及執事禱祠于上下神祇司巫國有大裁則師巫而造巫恒女巫凡邦之大裁歌哭而請春秋左傳襄公九年宋災二師令四鄉正敬饗祝宗用馬于四墉祀盤庚于西門之外昭公十八年五月壬午宋衛陳鄭皆大裁作鄭子產辭晉公子公孫于東門使司寇出新客禁舊客勿出于宮使子寬子上廵群屏攝至于大宮使公孫登徙大龜使祝史徙主祐于周廟告于先君使府君庫人各徹其事商成公徹司宮出舊宮人寘諸火所不及司馬司寇列火居道行火所燉城

下之人伍列登城明日使野司寇各保其徵郊人助祝史除于國北攘火于玄冥回祿祈于四墉書焚室而寬其征典之材三日哭國不市使行人告于諸侯宋衛皆如是哀公三年五月辛卯司鐸火之踰公宮桓僖災救火者皆曰顧府南宮敬叔至命周人出御書俟于宮曰危汝而不在死于服景伯至命宰人出禮書以待命之不共有常刑校人乘馬中車脂轄百官之備府庫慎守官人肅給濟濡惟幕鬱攸從之蒙葺公屋自大廟始外內以悛助所不給有不用命則有常刑無赦公父文伯至命校人駕乘車季桓子至御公立于象魏之外命救火者傷人則止穀梁傳成公五年梁山崩壅河三日不流晉召伯尊伯尊曰君親素編帥郡臣而哭之既而祠焉斯流矣在左傳山崩川竭君為之不舉降服乘縵出次祝幣史辭而禮焉

弔裁禮

小行人若國有裁則令哀弔之春秋左傳宋大水公使弔焉曰天作淫雨害于棗盛若之何不弔對曰孤寔不敬天降之裁又為君憂拜命之辱莊公十一年宋大裁叔孫豹會晉趙武齊公孫蠆宋向戌衛北宮佗鄭罕虎及小邾之大夫會于澶淵為宋裁故以謀歸宋襄公三十年許不弔裁君子知許之先亡也昭十八年雜記既焚孔子拜鄉人為火來者拜之士壹大夫再亦相弔之道也



## 致禴禮

大宗伯以禴禮哀圍敗大行人致禴以補諸侯之災小行人若國師役則令禴禴之春秋左傳昭公六年叔弓如楚聘且弔敗也哀公十五年楚子西子期伐吳陳侯使公孫貞子弔焉吳子使太宰嚭勞哀公二十年越圍吳趙孟降于喪食使楚隆告于吳王曰寡君之老無恤使陪臣隆敢展謝其不共黃池之役君之先臣志父得承齊盟曰好惡同之今臣在難無恤不敢憚勞非晉國之所能及也使陪臣敢展布之王拜稽首曰寡人不佞不能事越以為大夫憂拜命之辱與之一簞珠使問趙孟曰勾踐將生憂寡人寡人死之不得矣王曰溺人必笑吾將有問也史黯何以得為君子對曰黯也進不見惡退無謗言王曰宜哉僖公三十三年公如齊朝且弔有狄師也

## 恤禮

大宗伯以恤禮哀寇亂春秋左傳昭公二十一年宋華亥向寧華定自陳入于宋南里以叛二十二年遂越使告于宋曰寡君聞君有不令之臣為君憂無寧以為宗蓋寡君請受而戮之對曰孤不佞不能媚其父兄以為君憂拜命之辱襄公十四年衛獻公使子蟜子伯子皮與叔文子盟于丘宮孫子皆殺之去如鄆使子行于孫子孫子又殺之公出奔齊孫氏追之敗公徒于河澤公使厚成叔弔于衛曰寡君使濬聞君不撫社稷而越在

他竟若之何不弔以同盟之故使濬敢私于執事曰有君不弔有臣不敏君不赦宥臣亦不帥職增淫發洩其君之何衛人使大叔儀對曰郡臣不佞得罪于寡君寡君不以即刑而悼棄之以為君憂君不忘先君之好辱弔群臣又重恤之敢拜君命之辱重拜大貺

### 唁禮

詩載馳歸唁衛侯春秋穀梁傳弔失國曰唁公羊傳弔亡國曰唁弔失國曰弔昭公二十五年公孫于齊次于陽州齊侯唁公子野井二十九年公至自乾侯居于鄆齊侯使高張來唁公三十一年晉侯使荀躒唁公于乾侯公羊傳昭公二十五年公孫于齊侯唁公于野井曰奈何君去魯國之社稷昭公曰喪人不佞失守魯國之社稷執事以羞再拜顙高子執簞食與四脰脯國子執壺漿曰吾寡君聞在外餒饗未就敢致糗于從者昭公曰君不忘吾先君延友喪人錫之以大禮載拜稽首以旌受高子曰有夫不祥君無所辱大禮昭公蓋祭而不嘗景公曰寡人有不腆先君之服未之敢服有不腆先君之器未之敢用敢以請昭公曰喪人不佞失守魯國之社稷執事以羞敢辱大禮敢辭景公曰寡人有不腆先君之服未之敢服有不腆先君之器未之敢用敢固以請昭公曰以吾宗廟之在魯也有先君之服未之能以服有先君之器未之敢以出敢固辭景公曰寡人

有不腆先君之服未之敢服有不腆先君之器未之敢用請以  
饗予從者昭公曰喪人其何稱景公曰孰君而無稱昭公于是  
噉然而哭諸大夫皆哭既哭以遇札相見孔子曰其禮典其辭  
足觀矣

經禮補逸卷之六

國家圖書館, NATIONAL CENTRAL LIBRARY, TAIWAN, R.O.C.

經禮補逸卷之七

軍禮

振旅禮

書大禹謨禹班師振旅周禮大司馬中春教振旅司馬以旗致  
民平列陣如戰之陳辨鼓鐸鐻之用王執路鼓諸侯執賁鼓  
將軍執晉鼓師帥執提旅帥執鼙卒長執鐻兩司馬執鐸公司  
馬執鐻以教坐作進退疾徐䟽數之節大宰作大事則戒于百  
官贊王命謂助王為教令按春秋傳小宰以法掌祭祀朝覲會  
同賓客之戒惧軍旅因之大事在祀典戎後喪荒亦如之令百官府其財用治其  
施舍聽其治訟大司馬若大司則掌其戒令位太卜帥執事注

釁王及軍器司戈盾軍旅授貳車戈盾建乘車之戈盾授旅賁  
及虎士戈盾司弓矢凡師後頒弓弩授甲兵之儀司常凡軍事  
建旌旗大司徒大軍後以旗致萬事民而治其徒庶之政令大僕  
凡軍旅贊王鼓之人以鼗鼓之軍事凡軍旅夜鼓鑿軍動則鼓  
其衆中車掌王之五路革路龍勒條纓五就建太白以即戎車  
僕掌戎路之萃廣車之萃闕車之萃萃車之萃輕車之萃凡師  
共革車各以其萃典路凡軍旅以路從銜枚氏軍旅令銜枚禁  
囂呼嗷鳴于國中者大師執同律以聽軍聲而詔吉凶幕人軍  
旅共其帷幕幄帟綬掌次師田則張幕設重帟重案廩人凡師  
後之事則治其糧典其食封人軍旅則飾其牢牲外雍養師後則  
掌共其餼賜脯肉之事委人軍旅共其委積薪芻遺人凡師後  
掌其道路之委積小子凡田師斬牲以左右徇陳牛人軍事共  
其犒牛凡軍旅行後共其兵車之牛小行人若國師後則令犒  
檜之縣師若將有軍旅田後之戒則受法于司馬以作其衆庶  
及馬牛車輦會其車人之卒伍使皆備旗鼓兵器以帥而至大  
司寇凡大軍旅涖戮于社士師大師之其屬而禁逆軍旅者與  
犯師禁者而戮之鄉士大軍旅則各掌其鄉之禁令帥其屬夾  
道而蹕

### 芡舍禮

大司馬中夏教芡舍如振旅之陳群吏撰車徒讀書契辨號名

之用帥以門名縣鄙各以其名家以號名鄉以州名野以邑名百官各象其事以辨軍之夜事其他皆如振旅

### 治兵禮

大司馬中秋教治兵如振旅之陳辨旗物之用王載大常諸侯載旂軍吏載旗師都載纁鄉遂載物郊野載旒百官載旗各書其事與其號焉其他皆如振旅

### 大閱禮

大司馬中冬教大閱前期群吏戒衆廢修戰法虞人萊所田之野為表百步則一為三表又五十步為一表田之日司馬建旗于後表之中群吏以旗物鼓鐻鐸各帥其民而致質明弊旗追後至者乃陳車徒如戰之陳皆坐群吏聽誓于陳前斬牲以左右徇陳曰不用命者斬之中軍以鞀令鼓之人皆三鼓司馬振鐸群吏作旗車徒皆作鼓行鳴鐻車徒皆行及表乃止三鼓攬鐸群吏幣旗車徒皆坐又三鼓振鐸作旗車徒皆作鼓進鳴鐸車徒驟徒趨及表乃止坐作如初乃鼓車馳徒走及表乃止鼓戒三闋車三發徒三刺乃鼓退鳴鏡且卻及表乃止坐作如初司常掌九旗之物名各有屬以待國事日月為常交龍為旂通帛為纁雜帛為物熊虎為旗鳥隼為旟龜蛇為旐全羽為旛析羽為旟及因之大閱贊司馬頒旗物王建大常諸侯建旂孤卿建纁大夫士建物師都建旗州里建旟縣鄙建旒道車建旛

旂車載旌皆畫其象焉春秋桓公六年秋八月壬午大閱

愚按周禮先王寓軍政于四時之田不廢武備中春教振旅以教坐作進退疾徐䟽數之節中夏教芟舍以辨號名之用中秋教治兵以辨旗物之用其他皆如振旅然其法畧于三時而致備于中各者為農隙也故于是時簡車徒精器物屬旗鼓以教衆庶修戰法斬牲徇陳訓誓之使耳目之衆莫不一心驟趨之節無有異習誅一庸慢甄一用命改易視聽以作其勇敢之氣而民趨勞如趨逸者蓋以其令之素教之善也今桓公乃大閱于煩暑之月不惟妨民失政之非而妄為僭禮之舉是豈事上臨下之道先王教民之意哉故春秋特書之以垂戒焉耳

### 蒐田禮

大司馬中春教振旅遂以蒐田有司表貉誓民鼓遂圍禁火弊獻禽以祭社大司徒大田後以旗致萬民而治其徒庶之政令縣正若將用野民師田行後移執事則帥而致治其政令既後則稽功會事而誅賞鄉師凡四時之田前期出田法于州里簡其鼓鐸旗物兵器修其卒伍及期以司徒之大旗致衆庶而陳之以旗物辨鄉邑而治其政令刑禁巡其前後之屯而戮其犯命者斷其爭禽之訟稍人若有師田行後之事則以縣師之法作其同徒輦輦帥而至治其政令以聽于司馬小宗伯若大田

則帥有司而饁獸于郊遂頒禽肆師凡四時之大甸獵祭表貉  
則為位遂師軍旅田獵平野民掌其禁令比叙其事而賞罰之  
遂人師田作野民帥而致掌其政治禁令甸祝掌四時之田表  
貉之祝號禡牲掌其祝號小宰以法掌朝覲會同賓客之戒具  
軍旅田役亦如之令百官府共其財用治其施舍聽其治訟小  
子凡師田斬牲以左右徇陳中車掌王之五路木路前樊鵠纓  
建大麾以田、僕掌馭田路以田以鄙掌佐車之政設逆驅之  
車令獲者植旌及獻比禽凡田王提馬而走諸侯晉大夫馳校  
人田獵則帥送驅之車幕人田役共其帷幕幄帟綬掌次師田  
則張幕設重案司几筵凡師田設則設熊席右漆几司常凡軍  
事建旌旗田亦如之大僕凡軍旅田役贊王鼓、人軍動則鼓  
其衆田後亦如之司弓矢殺矢鏃矢用諸田獵獸人掌罟田獸  
辨其名物冬獻狼夏獻麋春秋獻獸時物田則守罟及弊田令  
禽注于虞中凡田獸者掌其政令山虞若大田獵則萊山田之  
野及弊田植虞旗于中致禽而珥烏澤虞若大田獵則萊澤野  
及弊田植虞旗以屬禽迹人凡田獵者受令烏禁麇卯者典其  
毒矢射者郊特牲季春出火為焚也然後簡其車賦而歷其卒  
伍而君親誓社以習軍旅左之右之坐之起之以觀其習變也  
而流示之禽而監諸利以觀其不犯命也監讀為艷歎  
艷于利也曲禮國  
君春田不圍澤大夫不掩群士不取麇卯詩吉日既張我弓既



挾我矢發彼小貆殪此大兕盧令刺荒于田也春秋傳魯昭公八年蒐于紅艾蘭以為防置旃以為轅門以葛覆盾以為紮流旁握御鞞者不得入車執塵馬候蹄揜禽旅御者不失其馳然後射者能中過旁弗逐下從奔之道也

愚按艾蘭以為防以大艾章為防營也置旃以為轅門旃旗名謂植旗以為門轅門是植車以為門舍其五十步後表之中謂君表也覆纏盾檣紮門闌也以毛裘纏盾之上以為門闌也流旁握之四寸謂車與門之廣狹相值差偏以寸則擊挂于紮驅而不得入矣車執塵之不出徹馬候蹄蒺足疾遲相應也按詩傳朱子謂葛作榻即裘纏盾流旁握即間容

握文義相同攷之車之制具見于考工記輿人輪人之治御之名僅見于保氏五御之目是制莫難于人習莫難于戰所謂以不教民戰是謂棄之也此固因田車之御以閱軍旅之車習民于變為戰之備所謂教于田獵以習五戎是也夫群卒伍之衆局熊虎之氣三鼓振鐸當車徒驟趨禽獸流崩之時騎射驅逐之際苟御之不以其道勘失之寸則車挂馬潰駭而莫之為射不及中而犯命之罰及之習之為易乎噫御車節奏之法其難如此則夫御人之道又何如哉

### 苗由禮

大司馬中夏教芟舍遂以苗田如蒐之法車弊獻禽以饗祫王

制天子殺則下大綏諸侯殺則下小綏大夫殺則止佐車佐車  
止則百姓田獵殺獲也下偃仆之也綏旌旗之屬佐車即周禮逆驅之車也

### 獮田禮

大司馬中秋教治兵遂以獮田如蒐田之法羅弊致禽以祀枋  
肆師獮之曰涖卜來歲之戒春秋莊公八年春甲午治兵月令  
季秋天子乃教于田獵以習五戎五戎謂弓矢及矛戈戟之五兵也

### 狩田禮

大司馬中冬教大閱遂以狩田以旌為左右和之門群吏各帥  
其車徒以叙和出左右陳車徒有司平之旗居卒間以分地前  
後有屯百步有司巡其前後險野人為主易野車為主既陳乃  
設驅逆之車有司表貉于陳前中軍以鼙令鼓之人皆三鼓群  
司馬執振鐃車徒皆作遂鼓行徒銜枚而進大獸公之小獸私  
之獲者取左耳及所弊鼓皆戒車徒皆戒課徒乃弊致禽饁獸  
于郊入獻禽以享烝詩車攻田車既好駕言行狩春秋桓公四  
年春正月公狩于郎

愚按郎非國內之狩故書地譏遠也

### 禴禮

太祝大師禴上帝詩皇矣篇是禴是禡王制天子將出征類于  
上帝

愚按國之大事在祀典戎此為師祭也師興征伐類于上帝

言禮以敬其事也

### 禡禮

大司馬有司表貉于陳前甸祝掌四時之田表貉之祝號肆師凡四時之大甸獵祭表貉則為位王制禡于所征之地詩皇矣是類是禡

按禡行師之祭也

### 宜禮

大祝大師宜于社王制天子將出征宜乎社春秋右左傳受脤于社

愚按宜出兵祭社之名社所以神地道主陰先王建國左祖右社大社在庫門之內右國社亦在公宮之右皆尚陰也陰主殺故誓社而田因田而習軍旅出征祭之稱其義也然征既宜于社而又類于上帝造于祖禡何哉蓋生殺非王者所得私也類于上帝明奉天討也造于祖禡示受命于廟不敢自專也曰類曰宜曰造祭雖先後不同合周官王制泰誓言之其義各有攸當也

### 造禮

大祝掌六祈以同鬼神示二曰造大師造于祖王制天子將出征造乎禡

愚按造：而告之：祭也告于祖禡告以道其事而致其敬

也攷之王制又曰受命于祖泰誓曰受命于天考此蓋因造  
告卜於廟受命于祖考而後征也

### 祭馬祖禮

校人春祭馬祖執駒庾人掌阜馬及祭馬祖詩吉日吉日維戊  
既伯既禱

按伯馬祖也謂天駟房星之神也禱祀而祈之也

### 祭先牧禮

校人夏祭先牧頒馬攻特庾人祭閑之先牧

### 祭馬社禮

校人秋祭馬社臧僕

### 祭馬步禮

校人冬祭馬步獻馬講馭夫甸祝禡牲禡馬皆掌其祝號

### 大合軍禮

大司馬及師大合軍以行禁令以救無辜伐有罪

### 誓師禮

士師以五戒先後刑罰一曰誓用之于軍旅大司徒施十有二  
教八日以誓教恤則民不怠書大禹謨禹乃會群后誓于師曰  
濟：有衆咸聽朕命止其克有勳甘誓大戰于甘乃召六卿王  
曰嗟六事之人予誓告汝止予則孥戮汝胤征惟仲康肇位四  
海胤侯命掌六師羲和廢厥職酒荒于厥邑胤侯承王命祖

征告于衆曰嗟于有衆止其爾衆士懋戒者哉湯誓王曰格爾衆庶悉聽朕言止罔有攸赦秦誓惟十有三年春大會于孟津王曰嗟我友邦冢君越我御事庶士明聽誓止時哉不可失維戊午王次于河朔群后以師畢會王乃徇師而誓曰嗚呼止惟克永世時厥明王乃大巡六師明誓衆士王曰嗚呼我西土君子止維予小子無良牧誓時甲子昧爽王朝至于商郊牧野乃誓王左杖黃鉞止其于爾躬有戮

### 致師禮

環人掌致師大司馬及致建大常比軍衆誅後至者春秋傳宣公十二年楚許伯衛樂伯聃叔為右以致晉師許伯曰吾聞致師者左射以蔽代御執轡御下兩馬掉鞅而還聃叔曰吾聞致師者右入壘折馘執俘而還皆行其所聞而復

### 大獻禮

大祝軍歸獻于社則前祝大司馬若師有功則左執律右執越以先愷樂獻于社大司樂王師大獻則令奏愷樂：師凡軍大獻教愷歌遂倡之眡瞭賓射皆奏鍾鼓愷獻亦如之鑄師軍大獻則鼓其大愷樂春秋左傳凡諸侯有四夷之功則獻于王：以警于夷中國則否諸侯不相遺俘僖公二十八年五月丁未晉侯獻楚俘于王駟介百乘徒兵千文公四年甯武子曰諸侯獻王所愷而獻其功王于是乎賜之彤弓一彤矢百旅弓千

以覺報宴成公二年晉侯使鞏朔獻齊捷于周王弗見使單襄  
公辭焉曰蛮夷戎狄不式王命淫泆毀常王命伐之則有獻捷  
王親受面勞之所以懲不敬勸有功也兄弟甥舅侵敗王略王  
命伐之告事而已不獻其功所以敬親暱禁淫慝也今叔父克  
遂有功于齊而奸先王之禮余雖欲于鞏伯其敢廢舊典以忝  
叔父夫齊甥舅之國也而大師之後也寧不淫于其欲怒叔父  
抑豈不可諫誨士莊伯不能對鄭伐陳入之子產獻捷于晉戎  
服將事晉人問陳之罪對曰昔虞闕父為周陶正以服事我先  
王我先王賴其利器用也典其神明之後也庸以元女大姬配  
胡公而封諸陳以脩三恪則我周之自出至于今是賴桓公之  
亂蔡人欲立其出我先君莊公奉五父而立之蔡人殺之我又  
典蔡人奉戴厲公至于莊宣皆我之自立夏氏之亂成公播蕩  
又我之自入君所知也今陳忘周之大德蔑我大惠弃我相親  
介恃楚眾以憑陵我敝邑不可億逞我是以有往年之告未獲  
成命則有我東門之後當陳隧者井堙水利敝邑大惧不競而  
耻大姬天誘其衷啟敝邑心陳知其罪授手于我用敢獻功晉  
人曰何故戎服對曰我先君武莊為平桓卿士城濮之後文公  
布命曰各服舊職命我又公戎服輔王以授楚捷不敢廢王命  
故也士莊伯不能詰乃受之襄公二十五年成公二年鄭皇成  
如楚獻捷昭公十年季平子伐莒取郟獻俘十七年晉荀吳滅

陸渾猷俘于文宮

釋奠猷禮

大祝及軍歸反行舍奠王制出征執有罪反釋奠于學以訊猷告

愚按訊者問其首惡猷者截其左耳夫執訊獲醜而反舍奠于先聖先師以是告之者蓋始出征受成于學今師還以武功告成于文德之地明不專恃予威戮而必任之以德禮也昔僖公在類猷猷而國人以文武頌之者亦以此歟

大均禮

大宗伯大均之禮恤衆也大司馬均守平則以安邦國大司徒以土均之法辨五物九等制天下之地征以作民職以令地貢以歛財賦以均齊天下之政小司徒受邦國之比要乃會萬民之卒伍而用之五人為伍五伍為兩四兩為卒五卒為旅五旅為師五師為軍以起軍旅以作田役以比追胥以令貢賦乃分地域而辨其守施其職而平其政土均賞平土地之政以均地守以均地事以均地貢均人賞均人民牛馬車犖之力政以歲上下書康誥昔君文武丕平富

大役禮

大宗伯大役之禮任衆也小司從大軍旅帥其衆庶小軍旅巡後乃均土地以稽其人民而周知其數上地家七人可任也者

家三人中地家六人可任也者家五人下地家五人可任也者  
家二人凡起徒役毋過家一人以其餘為羨唯田與追胥竭作  
卿大夫以歲時登其夫家之眾寡辨其可任者國中自七尺以  
及六十有五皆征之其舍者國中貴者賢者能者服公事者老  
者疾者皆舍大司馬凡令賦以地與民制之上地食者參之二  
其民可用者家三人中地食者半其民可用者二家五人下地  
食者參之一其民可用者家二人大役與慮事屬其植受其  
要以待考而賞誅縣縣士邦有大役聚眾庶則各掌其縣春秋  
左傳凡土功龍見而畢務戒事也火見而致用水昏正而歲日  
至而畢

### 大封禮

大宗伯大封之禮合眾也大司徒辨其邦國都鄙之數制其畿  
疆而溝封之大司馬制畿封國以正邦國形方氏掌制邦國之  
地後而正其封疆無有華離之地司凡筵凡封國王位設黼衣  
內史凡命諸侯及孤卿大夫則冊命之大宗伯王命諸侯則儼  
大司徒凡建邦國以土圭土其地而制其後諸公之地封疆方  
五百里其食者半諸侯之地封疆方四百里其食者參之一諸  
伯之地封疆方三百里其食者參之一諸子之地封疆方二百  
里其食者四之一諸男之地封疆方百里其食者四之一凡造  
都鄙制為地域而封溝之以其室數制之不易之地家百畝一



易之地家二百畝再易之地家三百畝

愚按大司徒論公侯伯子男之地各以封疆言而其食者或半或參之一或四之一參諸王制以田言孟子以班祿言蓋皆專主田祿此正周禮所謂食者也大抵周禮所載凡五等通以封疆言兼附庸在其內王制孟子凡三等專以田祿言附庸不在其列此所以有多寡之殊也嘗攷周公之封于魯太公之封于齊孟子所謂侯方百里也然魯頌有曰王曰叔父建爾元子乃命魯公俾侯于東錫之山川土田附庸又曰奄有龜蒙遂荒大東至于海邦淮夷來同此豈魯方百里所能容乎左傳有曰昔召康公命我先君太公夾輔周室賜我先君履東至于海西至于河南至于穆陵北至于無棣此豈齊方百里所能容乎要之周之封爵惟杞宋為上公齊魯爵皆侯之封疆方四百里其食者參之一食者三之一則封疆百里有奇正孟子所謂侯方百里魯頌所謂錫之土田者也其餘封疆迨三百里正魯頌所謂錫之附庸如魯有邾葛顓臾之類是已戡方氏凡邦國千里封公以方五百里則四公方四百里則六侯方三百里則七伯方二百里則二十五子方百里則百男以同知天下周易師上六大君有命開國承家

大封告后土禮

大宗伯王大封則先告后土大祝建邦國先告后土用牲幣

經禮補逸卷之七



國家圖書館, NATIONAL CENTRAL LIBRARY, TAIWAN, R.O.C.

經禮補逸卷之八

賓禮

朝禮

周禮大宗伯春見曰朝大行人春朝諸侯而圖天下之事幕人  
凡朝覲共其帷幕惟變綬掌次諸侯朝覲則張次小次小臣  
朝覲沃王盥司凡筵凡大朝覲王設位輔依：前南向設筦筵  
紛純加繅席畫純加次席黼純左右玉几典瑞公執桓圭侯執  
信圭伯執躬圭繅皆三采三就子執穀璧男執蒲璧繅皆二采  
再就以朝于王大史朝覲以書協禮事執書以詔王司士正朝  
儀之位辨其貴賤之等三公北面東上孤東面北上御大夫西

向北上朝士掌外朝之法左九棘孤卿大夫佐焉詳士在其後  
右九棘公侯伯子男位焉群吏在其後面三槐三公位焉州長  
衆庶在其後

愚按周官有三公三孤之官而周禮不言其職論者乃謂師  
氏保氏即大師大保卿老二卿則公一人註則以為三公豈  
知師氏保氏乃中下大夫之職且未聞以傳稱而卿老公一  
人乃置地官之列屬然則三公居六卿之上而遽以是為三  
公之師保可乎據今朝士司士所稱是則周禮未嘗不言公  
孤也特以六卿而上兼公孤故不正言其職以繫六官之下  
爾參諸周書顧命曰召大保奭芮伯彤伯畢公衛侯毛公此

蓋當時之六卿而奭以大保言也毛畢以公言是以卿兼公  
故以公稱餘三人者以卿而兼孤又可以類推也此不可不  
辨

大宗伯朝覲則為上相大司寇凡朝覲前王大僕王視朝則正  
前位而退入亦如之射人朝覲作大夫介校人朝覲毛馬而頒  
之飾幣大司徒大賓客令野修道委積委人賓客共其芻親小  
宗伯大賓客灌凡筵築鬻贊果將鬱人掌賓客之裸事和鬱  
鬯以寔彝而陳之旄人凡賓客舞燕樂籥師祭祀則鼓羽籥之  
舞賓客則亦如之餘人掌治倫見燕饗賓客札下大行人以九儀辨諸侯之命  
寺諸臣之爵以同邦國之禮上公之禮執桓圭九寸繅藉九寸

冕服九章建常九旒樊纓九就貳車九乘介九人禮九宰其朝  
位賓主之間九十疋立當車軹擯者五人諸侯之禮執信圭七  
寸縹籍七寸冕服七章建常七旒樊纓七就貳車七乘介七人  
禮七宰朝位賓主之間七十步立當前疾擯者四人諸伯執躬  
圭其他皆如侯諸之禮諸子穀璧五寸縹籍五寸冕服五章建  
章五旒樊纓五就貳車五乘介五人禮五宰朝位賓主之間五  
十步立當車衡擯者三人諸男執蒲璧其他皆如諸子之禮凡  
諸侯之卿其禮各下其君二等以下及其大夫士皆如之邦畿  
方千里其外方五百里謂之侯服歲一見又其外方五百里謂  
之甸服二歲一見又其外方五百里謂之男服三歲一見又其  
外方五百里謂之采服四歲一見又其外方五百里謂之衛服  
五歲一見又其外方五百里謂之要服六歲一見

愚按大司馬曰九畿職方氏曰九服：言服事天子畿猶疆  
限之謂其方里別同也參之周官乃曰六服五服何邪葛氏  
謂侯甸男采衛拜畿內為六服程氏伯圭釋謂五服蓋指甸  
男采衛要而侯服不在其數三說皆未安按大行人六服侯  
甸男采衛要是知要服即蠻服也其曰五服一朝者要服不  
與其列其曰九服而來朝者亦止五服蓋衛服之外聖人雖  
制之服令蕃國世一見而不必其來非若五服一歲至五歲  
各以所貢來見也攷之武城止曰邦甸侯衛酒誥康王之誥

止曰侯甸男衛康誥亦止曰侯甸男采衛而蠻夷鎮藩不與  
焉于此不必辨其服之異而自得其說之同矣

司儀掌九儀之賓客備相之禮將合諸侯則令為壇三成宮旁  
一門詔王儀南面見諸侯上揖庶姓時揖異姓天揖同姓及其  
擯之各以其禮

愚按大行人司儀掌九儀賓客擯相之禮而置司冠刑官之  
屬其稱名也不幾於雜乎徐攷之六官之中若此者衆如司  
士掌群官之版正朝廷之位而屬司馬之類是已論者率謂  
六官互相聯屬故六屬互相參錯然也豈知聯屬者此固周  
官立法之善然參錯者則亦必若是其不倫也又按小宰記

六官六屬各六十秋官自大司寇以下尚六十五人其職屬  
多寡不同初無是也要亦後之編錄敬帙者不免遞相差易  
故爾觀者察焉

小行人令諸侯春入貢王親受之各以其國之籍禮之凡諸侯  
入王則逆勞于畿及郊勞胝館將幣為承而擯曲禮天子當宁  
而立諸公東面諸侯西面曰朝鄭注春朝受摯于廟  
謂之燕朝大僕掌之一是路門外之廟謂之治朝司士  
掌之其三是臯門之內庫門之外謂之外朝士掌之

愚按天地位而尊卑定矣卑高陳而貴賤位矣王者首出庶  
物德配二儀其尊貴明矣而聖人所恃以為天下者不獨恃  
其尊貴勢分也故于諸侯之畢其中同姓則有伯父叔父焉

異姓則有伯舅叔舅焉有兄弟焉有婚姻焉于其來朝也逆  
勞胝館具備多儀篤以親之之恩接以主擯之禮而恩禮雖  
雖乎尊貴勢分之間有莫知其德之感化之至也此春朝所  
以異乎覲禮之受于廟而臣皆北面也夫摯貢諸侯所以述  
戩也今也親受之于朝其志重于器物者明重賢之禮等也  
祭罷天子所以事神也今烏用之于大饗其致敬于賓客者  
示神事之禮同也若是者豈天子自示寡昧而忘其尊卑之  
分哉蓋以億兆歸于一人未易遽化也治亂潛幾于一德而  
一德難于遽孚也于是崇德率眾謙已下賢俾上之恩深下  
之報厚內外同獎于一心遠近咸歸于一德卒致垂拱成化

享國永年而能保其尊貴者有由來矣此所以為三代之至  
文朝見之盛禮也

書周官六年五服一朝王制天子無事與朝侯相見曰朝考禮  
正刑一德以尊天子曲禮君天下曰天子朝諸侯分戩受政任  
功曰予一人諸侯見天子曰臣某侯某按此指者告天子之辭也凡自稱皆曰寡人  
樂記朝覲然後諸侯知所以臣春秋隱公十一年春滕侯薛侯  
來朝哀公二年夏滕子未朝不來至

愚按春秋書朝三十有六始于滕薛終于滕子然當時或受  
其朝禮而不報或累往不納而以歸厚薄疏數之節不惟無  
合于先王殷聘世朝之儀而諸侯于天子述職之典蓋缺如

也經皆書而不削以示強弱安危是非邪正為後世鑒也

### 覲禮

大宗伯秋見曰覲大行人秋覲以比邦國之功小行人令諸侯秋獻功王親受之各以其國之籍禮之訝士邦有賓客則典行人送送之入于國則為之前驅而辟野亦如之居館則帥其屬而為之蹕小司徒乃頒比法于六卿大夫使各登其卿之衆寡六畜車輦辨其物鄉師以國北之法以時稽其夫家衆寡辨其老幼貴賤廢疾馬牛之物若國大比則攷教察辭稽器展事以詔誅賞曲禮天子當依而立諸侯北面而見天子曰覲按秋受之于廟覲者位于廟門外而序入詩韓侯入覲以其介圭入覲于王大雅韓奕

春秋左傳襄公三十一年子產曰諸侯賓至佃設庭燎詩韓奕篇韓侯入覲以其介圭入覲于王覲禮諸侯辭于天子王曰伯父無事歸寧乃邦

愚按此諸侯入辭而天子告之、辭也忠厚警戒諷然見之參之書文侯之命曰父義和其歸視爾師寧爾邦其義同也

### 宗禮

大宗伯夏見曰宗大行人夏宗以陳天下之謨司會以九貢之法致邦國之財用以九賦之法令田野之財用以九功之法令民職之財用以九式之法均節邦之財用以周知四國之治大



司徒施十有二教焉一曰以祀禮教敬則民不苟二曰以陽禮教讓則民不爭三曰以陰理教親則民不怨四曰以樂禮教和則民不乖五曰以儀辨等則民不越六曰以俗教安則民不輸七曰以刑教中則民不越八曰以誓教恤則民不怠九曰以度教節則民知足十曰以世事教能則民不失職十有一曰以賢制爵則民慎德十有二曰以庸制祿則民興功齊僕以宗遇皆秉金路其法儀各以其等為車逆送之節詩朝宗于海

### 遇禮

大宗伯冬見曰遇大行人冬遇以協諸侯之慮掌文掌以節典幣巡邦國之諸侯道王之德意志慮使知王之好惡曲禮諸侯

未及期相見曰遇春秋隱公四年夏公及宋公遇于清莊公三

夏宋公齊侯  
遇于梁丘

愚按古者諸侯朝覲于王不期而遇諸塗則舉相見之禮猶存恭肅之心若春秋書遇則皆惡其簡禮之私而無合乎先王制禮之意也

### 時會禮

大宗伯時見曰會大行人時會以發四方之禁大宗伯會同則為上相大司馬會同則帥士庶子而掌其政令小司馬會同掌其事如大司馬之法射人會同作大夫介諸子凡會同作群子從司士凡會同作士從小祝凡外內小會同掌事焉旅賁氏掌

執戈盾夾王車而趨左八人右八人凡會則服而趨車僕凡師  
共輦車各以其萃會同之亦如虎賁氏掌先後王而趨以卒伍  
軍旅會同亦如之司兵軍事建車之五兵會同亦如之司常掌  
九旗之物名各有屬凡祭祀各建其旗會同亦如之典路凡會  
同以路從司戈會同授貳車戈盾建乘車之戈盾授旅賁及虎  
氏戈盾掌次諸侯會同則張大次小次幕人凡會同共其帷幕  
幄帟綬掌舍掌王會同之舍設楹柅再重設車宮轅門為壇壝  
宮棘門為帷宮設旌門外府凡會同共其財用之幣旃賜予之  
財用廩人凡邦有會同之事則治其糧與其食遺人凡會同掌  
其道路之委積校人凡會同毛馬而頒之飾幣射鳥氏掌祭祀  
以弓矢歐鳥鳶凡會同亦如之戎石會同充輦車司右凡會同  
合其車之卒伍而比其乘屬其右牛人凡會同共其兵車之牛  
稍人若有會同則以縣師之法作其同徒舉輦帥而至縣師若  
將有會同之戒則受法于司馬以作其衆庶及馬牛車輦會其  
車人之卒伍使皆備旗鼓兵器以帥而至司弓矢凡會同頒弓  
弩各以其物從授兵車之儀大司馬以九伐之法正邦國馮弱  
犯寡則青之賊賢害民則伐之暴內凌外則壇之野荒民散則  
削之負固不服則侵之賊殺其親則正之放殺其君則殘之犯  
令陵政則杜之外內亂鳥獸行則滅之大司寇凡會同前五小  
司寇乃宣布于四方憲刑禁士師掌國之五禁一曰宮禁二曰

官禁三曰國禁四曰野禁五曰軍禁布憲執旌節以宣布于四方而憲邦之刑禁掌交以諭九禁之難曲禮諸侯相見于郤地曰會春秋隱公二年公會戎于潛哀公十三年夏公會晉侯及吳子于黃池

愚按時會謂時見也發禁者凡諸侯有不順服王則合諸侯而發其禁令以行征討之事如九伐之法此先王時會之禮也春秋書會九十五始于潛終于黃池中間彼善于此僅有蕭魚之特筆餘皆非王事而私會殊非周官入會致事禁止不義之制矣故曰凡書會皆譏也

### 殷同禮

大宗伯曰殷見曰同大行人殷同以施天下之政小行人其禮俗政事之達順每國辨異之以及命于王以周知天下之故大司馬掌建邦國之九法以佐王平邦國制畿封國以正邦國設儀辨位以等邦國進賢興功以作邦國建牧立監以維邦國制軍詰禁以糾邦國施貢分賤以任邦國簡籍鄉民以用邦國均守平則以安邦國北小事大以和邦國正月之吉始和布政于邦國都鄙乃縣政象之法于象魏使萬民觀政象

愚按周禮冬官久亡于象法之縣否無可攷也餘四官皆縣象法而何獨宗伯畧焉蓋冢宰司徒司馬司寇之所賤曰治曰教曰政曰刑此皆親民之事故各縣象法以示之若宗伯

所賦曰禮曰樂率皆朝廷宗廟之事于民為踈遠而且禮樂實本諸人心之和順非可以象求放畧之無庸縣可也或曰治教政刑可皆縣象于一時而禮樂之器之文其為品節制度此獨不可以一二象法示人而塗斯民耳目于無見聞之地邪曰六藝十二教之日禮樂具述其中而五禮六樂中和之教以防萬民之情偽者為尤著是以禮樂示斯民之教者固已縣謂地官司徒之教法而宗伯則以朝廷宗廟之禮樂為專職學者于此無徒事乎器物示人之粗迹而必求之人心之和順以推原聖人制作之微意則禮樂中和之教法不獨縣諸司徒而有得于吾心之寔者縣象昭々矣因并釋之乃以九畿之籍施邦國之政職方千里曰國畿其方五百里曰侯畿又其外方五百里曰甸畿又其外方五百里曰男畿又其外方五百里曰采畿又其外方五百里曰衛畿又其外方五百里曰蠻畿又其外方五百里曰夷畿又其外方五百里曰鎮畿又其外方五百里曰藩畿凡令賦以地與民制之

### 時聘禮

大宗伯時聘曰問大行人時聘以結諸侯之好小行人合六幣圭以馬璋以皮璧以帛琮以錦琥以繡璜以黼此六物者以和諸侯之好典瑞琬圭以結好掌交掌邦國之通事而結其交好曲禮諸侯使大夫問于諸侯曰聘春秋隱公七年齊侯使其弟

## 年來聘

愚按古者諸侯間于天子之事則有使問之聘詳見儀禮篇春秋諸侯朝禮不修間自相聘書于經者二十五始于弟年終于士執皆惡其挾邦交之私非時聘結好之禮故觀年之書法則可以推其餘矣

### 殷禰禮

大宗伯殷禰曰視大行人殷禰以邦國之慝王之所以撫邦國諸侯者三歲徧禰小行人其悖逆暴亂作慝猶犯令者每國辨異之以反命于王以周知天下之故典瑞琢圭璋璧琮繅皆二采一就以覲聘琖圭以除慝誦訓掌道方慝以詔辟忌以知土

俗王巡守則先王車匡人掌達法則匡邦國而觀其慝

### 問問禮

大行人問問以諭諸侯之志掌大賓之禮以親諸侯上公之禮三問三勞諸侯之禮再問再勞諸伯如諸侯之禮諸子之禮壹問壹勞諸男如諸子之禮掌交掌以節典幣處邦國之諸侯道王之德意志慮使咸知王之好惡訓誦掌道方志以詔觀事擇人掌誦王志道國之政事以巡天下之邦國而諭之

### 贄貢禮

大行人侯服其貢祀物甸服其貢嬪物男服其貢器物采服其貢服物衛服其貢材物要服其貢貨物

### 將幣禮

大行人上公廟中將幣三享王禮再裸而酢諸侯廟中將幣三享王禮一裸而酢諸伯如諸侯之禮諸子廟中將幣三享王禮一裸不酢諸男如諸子之禮小行人凡諸侯入將幣為承而賓司儀掌九儀賓客擯相之禮公于上等侯伯于中等子男于下等其將幣亦如之

### 饗食禮

大行人上公饗禮九獻食禮九牢出入五積諸侯饗禮七獻禮七牢出入四積諸伯如諸侯之禮諸子饗禮五獻食禮五牢出入三積諸男如諸子之禮

### 錫命禮

大宗伯王命諸侯則擯典命掌諸臣之五等之命上公九命為伯其國家宮室車旗衣服禮儀皆以九為節侯伯七命其國家宮室車旗衣服禮儀皆以七為節子男五命其國家宮室車旗衣服禮儀皆以五為節王之三宮八命其御六命其大夫四命及其出封皆加一等其國家宮室車旗衣服禮儀亦如之書說命之曰朝夕納誨以輔台德止欽予時命其維有終微子之命王若曰爾惟踐修厥猷有令聞恪慎克孝肅恭神人予嘉乃德曰篤不忘上帝時欽下民祇協庸建爾于上公尹茲東夏欽哉往敷乃訓慎乃服命蔡仲之命王若曰小子胡惟爾率德

改行克慎厥猷肆予命爾侯于東土往即乃封敬哉畢命王曰  
嗚呼父師今予祇命公以周公之事往哉罔命曰今予命汝作  
大正之于群僕侍御之臣懋乃后德交修不逮文侯之命王曰  
父義和其歸視爾師寧爾邦用賚爾秬鬯一卣彤弓一彤矢百  
盧弓一盧矢百馬四匹父往哉柔遠寧迓惠康小民無荒寧簡  
恤爾都用成爾顯德周易師九二王三錫命晉康侯用錫馬蕃  
庶晝日三接詩韓奕韓侯受命王親命之王錫韓侯淑旂綏章  
彤弓彤弓召兮受言藏之我有嘉賓中心貺之采芣君子耒朝  
何錫予之雖無予之路車乘馬又何予之玄衮及黼春秋莊公  
元年王使榮叔來錫桓公命

愚按周制諸侯踐位而入見則有錫命修聘來朝則有錫命  
能敵主所餼而獻功則有錫命此禮之正也若書稱蔡仲之  
命文侯之命詩稱王錫韓侯王命召虎之類是已若遣使就  
其國而錫命之禮無是也如春秋書王使榮叔來錫桓公命  
天王使毛伯來錫公命之類皆非正也比事以觀義自見矣  
左傳僖公二十八年王享醴命晉侯宥賜之大路之服戎路之  
服文公四年甯武子曰諸侯敵王所愾而獻其功于是予賜之  
彤弓一彤矢百秣弓矢千何氏曰禮有九錫一車馬二衣服三  
樂則四朱戶五納陛六虎賁七弓矢八鈇鉞九秬鬯  
王制天子賜諸侯樂則以祝將之賜伯子男樂則以鼗鼓將之

諸侯賜之矢然後征賜鈇鉞然後殺賜圭璜然後為魯

經禮補逸卷之八



國家圖書館, NATIONAL CENTRAL LIBRARY, TAIWAN, R.O.C.



經禮補逸卷之九

嘉禮

飲食禮

大宗伯以飲食之禮親宗族兄弟小宗伯掌三族之別以辨親疏大僕王燕飲則相其法小臣饗食掌事如大僕之法鍾師凡饗食奏燕樂鑄師凡祭祀鼓其金奏之樂饗食亦如之籥師祭祀則鼓羽籥之舞饗食則亦如之文王世子若公與族燕則異姓為賓膳宰為主人公與父兄齒族食世降一等公與族燕則以齒而孝悌之道達矣其族食世降一等公與族燕則

愚謂盛哉先王之禮也其本在於養性防欲其用在於視聽

言動周旋揖遜之間使人之視聽言動周旋揖遜一于禮則安有放其邪心驕奢淫佚蕩而莫之節者哉不放其邪心不驕奢淫佚蕩而莫之節則禍辭可惜息孝弟可行治教可興其立意微其為法遠矣故設其器備其物辨其數立其文以待其有事者其用則在乎視聽言動周旋揖遜之間而已然孝弟莫始于親親之心無所不用則燕之之禮不得而廢焉燕之禮不得而廢則設其器備其物辨其數立其文以待其有事者于是而用之也是故莫尊乎君也君雖尊不以位加于父兄燕序必以齒者達乎孝弟之道也莫親乎同姓也然親不可以無殺燕則族人世降一等焉凡燕之禮必主賓以備酬酢而族燕之賓主則異姓與膳宰為之者篤親親之道也夫飲食口腹之欲也而必節之以禮則驕奢淫佚平而無過也歌舞耳目之欲也而必和之以樂則言動揖遜易而無乖也莫不由親以篤乎恩有恩以著乎愛有愛以盡其禮盡其禮則言動視聽周旋揖遜之間不徒接于耳目所以服習而安之者自得于養性防欲之幾也雖然不特宗族兄弟之親也遠而異姓諸侯之君臣以至于蠻貊夷狄之邦皆由是禮之行故人說而天下服矣人說而天下服則禍亂何由作禍亂不作則孝弟行而治教興矣此乃先王之所以為燕也嗚呼于此可以現其禮之盛矣

月令季冬之月命樂師大合吹而罷

註歲將終與族人大飲王作樂于大寢以綴息也

居明堂禮季冬命國為酒以合三族大傳上治祖禰下治子孫旁治昆弟合族以食序以昭繆繆別之以禮義人道竭矣

愚按此言繼祖收族之禮故有上治下治旁治之道以正其息之隆殺屬之戚疏也蓋合族以食使之有所同而尊卑之禮一序以昭穆使之有所異而親疏之義明如此則皆有禮義之別而人之道盡于此矣抑常論之大宗無子則族人以支子為之後為所後服斬衰三年而降本親父母為期何也蓋于所後者以尊服之之又為降已親之服所以明所後者之為重而于大宗者上以繼祖下以收族不可以絕此聖人

制禮之意也或謂為人後者當易其父母之名從所後者為屬而使之無二是未攷于禮也蓋父母之服當降使明所後者重而已非遂以謂當變其親也親不當變則名可得而易乎名不可得而易則期服雖除心喪三年禮不可變也而謂輒可以絕其親乎不絕其親而能使其屬之疏者相與為重親之厚者相與為輕在以禮義明其內而不在于惡其為二而強易其名于外也雖然降父母之服禮則有之矣絕父母之名禮未之前聞也禮喪服齊衰不杖期章曰為人後者為其父母服此其名之見于經未嘗易也經既不易則凡為人後者生日本親父母沒曰考妣禮之正也愚故因昭穆之別

特附其說于下以俟知禮者商確焉

詩棠棣篇儗爾籩豆飲酒之飲兄弟既具和樂且孺伐木篇伐木許之醜酒有與既有肥羜以速諸父類弁爾酒既旨爾釐既嘉豈伊異人兄弟匪他

### 冠禮

大宗伯以冠昏之禮親成男女禮記冠義始冠之緇布之冠也大古冠布緇齊則緇之其緜也適子冠于阼以著代也內則二十而冠玉藻始冠緇布冠自諸侯下達冠而敝之可也玄冠朱組纓天子之冠也緇布冠績緜諸侯之冠也郊特牲無夫大冠禮古者五十而後爵何大夫冠禮之有諸侯之有冠禮夏之末也天子之元子士也天下無生而貴者也繼世以立諸侯象賢也冠義曰冠者禮之始也是故古者聖王重冠古者冠禮筮日筮賓所以敬冠事敬冠事所以重禮重禮所以為國本也重冠故行之于廟行之于廟者所以尊重事

### 三加冠禮

郊特牲醮于客位嘉有成也三加彌尊踰其志也冠而字之敬其名也委稅周道也章甫殷道也毋牟追推夏后氏之道也此始加之周弁殷哱訓夏收此三加三王共皮弁素積此論再加士冠禮始加祝曰令月吉日始加元服棄尔幼志順爾成德壽考維祺介尔景福再加曰吉月令辰乃申尔服敬爾威儀淑慎尔

糜壽萬年永受胡福三加曰以歲之正以月之令咸加爾服兄弟具在以成厥德黃苟無疆受天之慶

### 昏禮

大宗伯以冠昏之禮親成男女媾氏掌萬民之判凡男女自成名以上皆書年月日名焉令男女三十而娶女二十而嫁凡娶判妻入子者皆書之黨正凡黨之昏冠教其禮事掌其戒禁

愚按妻由判合故云判子者謂媵娣之類非聘之正故云入夫國之男女至衆也年月日名自成名以上皆書之及其判入又書日月以告君禮不幾于繁乎詎知先王之制所以厚男女之別正婚姻之禮者其馭人倫謹始之道至簡而要也

夫自有別推而至于萬物安則禮始于謹夫婦者繫于國之男女况于南向天下之主哉是故古之君子未嘗不以身化也故家人之義歸于反身二南之業本于文王世皆知內而后妃有閔睢之行外而郡臣有二美之美而不知其謹始由于文王之身化也考之行露之詩野有死麇之作專言男女貞潔強暴不能侵陵彼乘約肆淫丈夫尚不能安其守頽令天下之女子能之何其盛也人徒見江漢之小國兔置之野人莫不蒙化而善俗而不知其所以然者又本諸先王教化之行禮制之謹有以致之也于此可以觀禮而得其要矣曲禮故日月以告君齋戒以告鬼神為酒食以召鄉党僚友以

厚其別也郊特牲夫昏禮萬世之始也娶于異姓所以附遠厚別也告之以直信之事人也信婦人德也一與之齊終身不改故夫死不嫁曾子問娶婦之家三日不舉樂思嗣親也禮記昏禮不賀人之序也

### 問名禮

媒氏掌凡男女自成名以上皆書名為曲禮男女非有行媒不相知名

### 納幣禮

媒氏凡嫁子娶妻入幣純帛無過五兩曲禮非受幣不交不親郊特牲幣必誠辭無不腆

### 執見禮

郊特牲執摯以相見敬章別也按摯執所表記無禮不相見也真鴈也欲民之無相摯也

### 親迎禮

郊特牲男子親迎男先于女剛柔之義也天先乎地君先乎臣其義一也壻親御授綬親之也親之也者親之也敬而親之先王之所以得天下也出乎大門而先去聲男帥女女從男夫婦之義由此始也禮記哀公問冕而親迎不已重乎孔子對曰合二姓之好以為宗廟社稷主君何謂已重乎詩大明篇文定厥祥親迎于渭韓奕篇侯取妻汾王之甥蹶父之子韓侯迎止于蹶

之里

見舅姑禮

昏義夙興婦沐浴以俟見質明贊見婦于舅姑婦執筭棗栗改修以見贊醴婦之祭脯醢祭醴成婦禮也舅姑入室婦以特豚饋明婦順也郊特牲厥明婦盥饋舅姑卒食舅姑降自西階婦降自阼階

見庙禮

禮記曾子問三月而庙見稱來婦也擇日而祭禰成婦之義也

愚按禮舅姑存成婦明日婦見舅姑共盥饋之禮此成昏三月擇日祭禰者則舅姑已沒而婦見于庙也非謂庙見後擇

日又祭也婦人謂遂曰歸故稱來婦詩謂之子于歸易言歸妹是矣曰成婦之義者謂生既不獲共養于舅姑庙祭亦如生成盥饋之禮明敬事之當完故曰成婦之義也攷之昏義婦見舅姑贊醴婦之脯祭醢祭醴明敬事自此始故曰成婦之禮也此雖存歿不同亦皆互文以見義耳然則見庙必待三月者父母既沒為人子者謂婦之來以成絲麻布帛以審守委積蓋藏者其事也和室人當于夫在中

饋者其行也上以奉宗庙下以繼後世此又禮之重也職或不修有可去之事則不可以苟合也故必待久觀其成婦之道而後庙告焉此亦致敬于其所事也

## 賓射禮

大宗伯以賓射之禮親故舊朋友大司樂及射令委騶虞大僕王射則贊弓矢小臣賓射掌事如大僕之法鍾師凡射王奏騶虞鑄師凡祭祀鼓其金奏之樂賓射亦如之眡瞭賓射皆奏其鐘鼓之典庸器祭祀帥其屬而設筭簋陳庸器賓射亦如之大史凡射事飾中舍筭執其禮事司常凡射共獲旌射人治射儀王以六耦射三侯三獲三容樂以騶虞九節五正諸侯以四耦射二侯二獲二容樂以貍首七節三正孤卿大夫以三耦射一侯一獲一容樂以采蘋五節二正士以三耦射豻侯一獲一容樂以采蘩五節二正服不氏射則贊張侯以旌居之而待獲禮記射義故射者進退周旋還必中禮內志正外体直然後持弓矢審固持弓矢審固然後可以言中此可以觀德行矣

## 祭侯禮

射人祭侯則為位梓人張皮侯而棲鵠則春以功張五采之侯則遠國屬張獸侯則王以息燕祭侯之禮以酒脯醢其辭曰惟若寧侯毋或若女不寧侯不屬於王所故抗而射女強飲強食詔女曾孫諸侯百福書曰侯以明之

## 燕賓禮

樂記射鄉食饗所以正交接也射義古者諸侯之射也必先行



燕禮卿大夫士之射也必先行鄉飲酒之禮故燕禮者所以明君臣之義也鄉飲酒之禮者所以明長幼之序也詩小雅賓之初筵發彼有的以祈爾爵豳首篇以燕以射則燕則譽

愚按古者弦木為弧剡木為矢弧矢之利以威天下見于易繫侯以明之載于虞書則射藝已見于黃帝堯舜之時而其制度禮文則大備于周也何哉鄉三物之為教也曰六德曰六行曰六藝蓋蓄德植行而必播之以六藝射之所以為藝而次于禮樂者有足以成人之德行而觀其用舍者也古者天子以射選諸侯卿大夫士以中選之多寡為之慶讓蓋亦主乎習藝觀德之成而不專于寓禦侮克敵之備也諸侯之

射必先行燕禮卿大夫之射必先行鄉飲酒之禮此則飾之以禮所以明君臣之義長幼之序也其節天子以騶虞諸侯以豳首卿大夫士以采蘋采芣此則飾之以樂又所以養人之德使之周還中禮而各不失其節之志也故明乎此則事功成而德行立矣事功成而德行立則暴亂不作暴亂不作則身安而國家可保矣學者于此念始生桑弧蓬矢六以射天地四方必先有志于其所事勉乎心之所得身之所存事之所習以趨乎進德之階窮理之地而不愧于為男子者噫豈惟射哉曰并釋之

### 燕饗禮

大宗伯以燕饗之禮四方必先有志于其所事勉乎心之所得身之所存事之所習以趨乎進德之階窮理之地而不愧于為男子者噫

大宗伯以燕饗之禮親四方之賓客邊人賓客之事共其薦修之邊寔醢人賓客之禮共醢五十壘醢人賓客之禮共醢五十壘外府凡賓客共其財用之幣齋大司徒大賓客令野修道委積封人凡賓客則飾其牛牲牛人凡賓客之事共其牢禮積膳之牛司門凡四方之賓客造鳥則以告委人賓客共其芻薪澤虞凡賓客共澤物圉人凡賓客共其生獸死獸之物場人凡賓客共其瓜菰鬱人掌賓客之裸事和鬱鬯以寔彘而陳之司服凡賓客共其衣服而奉之典瑞凡賓客之事共其玉器而奉之鍾師凡饗食奏燕樂旋人凡賓客舞燕樂鐃師凡祭祀鼓其金奏之樂饗食亦如之籥師祭祀則鼓羽籥之舞饗食則亦如之司干祭祀舞者既陳則授舞器賓饗食亦如之鞀鞀氏祭祀則歌而舞之燕亦如之典庸器祭祀帥其屬而設筍簋陳庸器饗食亦如之司常掌九旗之物名各有屬凡祭祀各建其旗賓客亦如之大司馬饗食羞牲魚授其祭小司馬饗食射掌其事如大司馬之法量人凡饗賓制其從獻脯燔之數量羊人凡賓客共其法羊射鳥氏掌祭祀以弓矢歐鳥鳶凡賓客亦如之服不氏賓客之事則抗皮射人賓客則作御大夫從司士凡賓客作士

從諸子凡賓客作群子從旅賁氏掌盾戈者凡賓客則服而趨  
大僕王燕飲則相其法王眠燕朝則正位掌擯相王不眠朝則  
辭于三公及孤卿小臣正王之燕服位王之燕出入則前驅士  
師王燕出入則前驅而辟掌客掌四方賓客之牢禮飲食之等  
數凡諸<sup>侯</sup>之禮上公五積皆眠飧牽三閭皆修食五牢四食十簋  
十豆四十鉶四十有二壺四十鼎簋十有二牲三有十六皆陳  
饗餼九牢其死牢如飧之陳牽四牢米百有二十管醢醢百有  
二十壘車皆陳車米眠生牢二十車乘有五藪車米眠死牢  
牢十車三秬芻薪倍禾皆乘陳禽日九十雙股膳夫大宰以  
及歸三饗三食三燕若弗酌則以幣致之侯伯四積皆眠飧牽  
再閭皆修飧四牢食三十有二簋八豆三十有二鉶二十  
有八壺三十有二鼎簋十有二腥二十有七皆陳饗餼七牢其  
死牢如飧之陳牽三牢米百以足醢醢百壘皆陳米三十車禾  
四十車禾芻薪倍禾皆陳乘禽日七十雙股膳大牢三饗再食  
燕子男三積皆眠飧牽一閭以修飧三牢食十有四簋六豆二  
十有四鉶十有八壺二十有四鼎簋十有二牲十有八皆陳饗  
餼五牢其死牢如飧之陳牽二牢米八十管醢醢八十壘皆陳  
米二十車禾三十車芻薪倍禾皆陳乘禽日五十雙一饗一食  
一燕凡諸侯之卿大夫士為因客則如其介之禮以待之詩湛  
露厭<sub>々</sub>夜飲在宗載考彤弓鐘鼓既設一朝饗之鹿鳴我有旨

酒以燕樂嘉賓之心春秋莊公四年夫人饗齊侯于祝丘

愚按春秋傳晉侯饗齊侯宋公饗晉侯楚子饗公小邾子郊子來朝公與之燕公饗宰周公范宣子饗晉六卿于圃窻俞華耦來公與之燕至鄭伯饗王饗晉侯經皆不書而書夫人饗齊侯則以其非禮也

### 餼獻禮

掌客掌四方賓客之餼獻飲食之等數上公之禮羣介行人宰史皆有牢及歸凡介行人宰史皆有餼饗餼以其爵等為之牢禮之陳數唯上介有禽獻夫人致禮八壺八豆八籩膳夫大宰卿皆見以羔膳大宰侯伯凡介行人宰史皆致饗大宰食大宰卿皆見以羔膳大宰侯伯凡介行人宰史皆有餼饗餼以其爵等為之禮唯上介有禽獻夫人致禮六壺六豆六籩膳夫大宰卿皆見以羔膳特牛子男凡介行人宰史皆有餼饗餼以其爵等為之禮唯上介有禽獻夫人致禮六壺六豆六籩膳夫大宰卿皆見以羔膳特牛

### 摛相禮

司儀掌九儀之賓客摛相之禮以詔儀容辭令揖讓之節凡諸公相為賓主因五積三問皆三辭拜受皆旅摛主君郊勞交摛三辭及將幣交摛三辭車逆拜辱賓車進答拜三揖三讓每門止一相及廟唯上相入賓三揖三讓登再拜授幣及出車送三請三進再拜賓三還三辭告辭諸公之臣相為國客則三積皆

三辭拜受及大夫郊勞旅擯三辭拜辱三讓登聽命下拜登受  
賓使者如初之儀及將幣旅擯三辭拜送客辟三揖每門止一  
相及廟唯君相入三讓客登拜客三辭辟授幣下出大僕王燕  
飲則相其法王眡燕朝則正位掌擯相玉藻小國之君曰孤擯  
者亦曰孤上大夫曰下臣擯者曰國君之老下大夫自名擯者  
曰寡大夫公士擯則曰寡大夫寡君之老大夫有所往必與公  
士為賓也聘義卿為上擯大夫為中承卿擯士為紹擯三讓而  
後傳命三揖而後入廟門三揖而後至階三讓而後升所以致  
尊讓也禮器禮有擯詔樂有相步溫之至也

### 送迎禮

訝士邦有賓客則與行人送逆之司儀王燕凡諸侯相為國主  
賓主君郊勞交擯三辭車逆拜辱三揖三辭拜受車逆三還再  
拜及將幣車逆拜辱再拜授幣賓拜送幣及出車逆諸公之臣  
相為國客及大夫郊勞旅賓三辭拜辱及退拜辱送及將幣拜  
送客辟授幣下出君館客三辭介受命遂送凡四方之賓客禮  
儀辭命餼牢賜獻以二笄從其爵而上下之凡賓客送送同禮  
齊僕掌饗食皆乘金路其法儀各其等為車送送之節環入  
掌送送邦國之通賓客以路節達諸四方聘義君使士迎于竟  
大夫郊勞君親拜逆于大門之內而廟受北面拜眡拜君命之  
辱所以致敬也敬讓也者君子之所以相接也

## 勞禮

小行人凡諸侯入王則逆勞于畿及郊勞眠館司儀凡諸公相  
為賓主國五積三問再勞三辭三揖登拜受拜送郊勞三辭諸  
公之臣相為國客則三積郊勞三辭及禮私向私獻君勞客  
再拜稽首君答拜致饗餼如勞之禮曲禮大夫士見于國君  
若勞之則還辟再拜稽首

### 致贈禮

司儀致饗餼還圭饗食致贈及禮私向私獻皆再拜稽首君答  
拜聘義君親禮賓之私向私覲致饗餼還圭璋賄贈饗食燕所  
以明賓客君臣之義也

愚按古者天子所以撫諸侯之禮也春朝而圖天下之事時  
聘以結諸侯之好此諸侯所以事天子之禮也至于歲相問  
殷相聘世相朝此諸侯邦交之禮也禮若因君親往則大夫  
從王燕凡諸公相為賓主因其攜相禮儀餼牛賜獻各以其  
爵之等相待也聘事既畢主國君親執醴以禮賓而遂有私  
面私獻之禮賓皆再拜稽首所以正交接之義也致饗餼還  
圭璋賄贈饗食燕者賓介就館主君使卿致饋于賓而還  
以執耒之圭加以賄贈之禮也然則大夫從君聘而以已之私  
物覲見主國之君而見主國之卿大夫可乎夫執圭以以申  
信也將幣所以致敬也私以廷寔充于諸侯之庭則不敬也

不敬是無王矣夫既從君聘禮無外交也外交是二君矣此皆非禮也注者謂若大夫執其君之命圭而專使則當行私覲之禮以申已之信其說悖矣夫從君而耒與受命而聘一也一乃專二乃辟也攷之大宰以八柄詔王馭群臣曰祿以馭其富子以馭其幸若相覲以貨是人臣以利交也人臣以利交則二者胥失矣二者苟失其不致于無禮奪亂者未之有也

### 賀慶禮

大宗伯以賀慶之禮親異姓之國大行人賀慶以贊諸侯之喜小行人若國有福事則令慶賀之玉藻有慶非君賜不賀士于大夫不承賀下大夫于上大夫承賀

### 脤膾禮

大宗伯以脤膾之禮親兄弟之國小宗伯饗食授命大司馬饗食羞牲魚授其祭之僕凡祭祀致福者展而受之大行人歸脤以交諸侯之福春秋昭公十四年天王使石尚耒歸脤公羊傳脤者何姐寔也腥曰脤熟曰膾

愚接受脤于社是諸侯助祭而授姐寔也非助祭則不授也如襄王使宰孔賜齊侯昨是齊桓有獎王之功而加以殊禮也今王王使石尚賜宜社之內于魯非緣助祭于京師魯是以為禮乎是故受脤禮也歸脤非禮也

經禮附說

周禮一書果為周公所作乎漢武嘗謂周禮為瀆亂不驗之書何休又云六國陰謀之書歐文忠公謂周公禮可疑者二蘇頌濱謂周禮不可信者三是皆論以為非周公之遺制也然則周禮果非周公所作乎朱子蓋嘗以周家法度廣大精審言之嘗以周公建太平之基本稱之又嘗以周公從廣大心中流出稱之張橫渠謂周公治周莫詳于周禮賈公彥序周禮廢興又謂鄭玄徧覽群經知周禮者乃周公致太平之迹是則又明為周公所作也攷之西漢志于周禮未之見東漢儒林傳乃謂周官經六篇本孔安國所獻隋經籍志乃云漢時有李氏得周官上于河間獻王獨缺冬官一篇獻王購以千金不得遂以考工記補成六篇奏之孝武時蓋有其書特未與五經例置博士耳至西漢劉歆始置博士遂盛于世後世因有周禮作于劉歆之說是則周禮作于周公而非他人之制明矣然冬官何為而缺也經罹秦燼散帙之歎典漢儒編錄附麗之誤而始謂之缺也何以知其然愚因考補散逸得之夫五官所掌曰教曰治曰禮曰政曰刑而冬官則掌邦土或坐而論道謂之三公或作而行之謂之士大夫或審曲面勢以飭五材以辨民器謂之百工通四方之珍異以資之謂之商旅飭力以長地財謂之農夫治絲麻以成之謂之婦功此冬官之大較也見考工記所載者其屬二



十有九皆工之事而士與商農之職俱缺焉考之春官之中如世婦內宗外宗皆官中之職本屬天官而乃入之春官夏官之中如司子諸子皆掌士之職本屬冬官而乃入之夏官地官之中如司市質人廛人賈師司虺司稽胥各肆長泉府此皆主于商土均草人稻人場人司稼等職此皆主于農皆本屬各官因其職與大司徒掌土地人民者相類乃以入之地官若是者謂非編錄附麗之誤不可也况小宰記六官六屬各六十考之天官自大宰以下六十二地官大司徒以下七十九春官大宗伯以下七十一夏官大司馬以下六十九秋官大司寇以下六十五何則冬官獨缺而為數不及五官皆盈而餘數過之理無是也他如儀禮有嗇夫之官國語有司商之官皆不載諸周禮此亦冬官之脫簡也要之見載於攷工記者固為冬官之屬然司空掌邦土居四民時地利職不止此當自大司空小司空而下擴夏官之中掌士者地官之中掌商農者與夫嗇夫司商之數并今攷工記所載之工摠屬冬官則不惟合于周官司空之所職典小宰六官六屬之目而且周公制作之盛粲然溢著于編使人得以觀其會通而為太平典禮之全也中克寘因并錄卷末以俟博古君子正焉

附錄

修史還鄉閔文

寧國府准太平府閔該承准

應天府牒文承奉

尚書禮部符文欽奉

聖旨置局編修元史已行纂成洪武二年八月十一日

左丞相宣國公上

表進呈

御覽過欽奉

聖旨編史儒士一十六名各與兩表裏銀三十二兩除存留外

老病的送還鄉里欽此欽送外數內儒士汪克寬等六名  
元係徽州紹興等府請到儒士擬合欽依送還鄉里為此  
省部除將各人元閔號色繳回兵部外仰欽依

聖旨事意即便應付船隻遞送還鄉仍行移前路官司一體應  
付遇陸路應付脚力接送無得失悞遲滯奉此當府除已  
應付外牒可依上應付順便船隻遞送還鄉仍行移路  
官司一體應付如遇陸路一體應付接送施行毋得違悞  
蒙此當府已除應付外閔請依上應付施行准此當府  
除已應付外合行移閔請照驗煩為依上應付順便船隻  
接送施行如遇陸路應付脚力接送請勿遲滯須至閔者

### 環谷汪先生行狀

先生諱克寬字德輔一字仲裕汪其姓也上世自歙縣之黃墩  
遷于祁門縣北之石山至諱釗徙居縣南之韓變溪五傳有兄  
第七人茲有才名其第五子世容生深、生敏、生黻、生二  
子長若思無子以弟若谷子僑為嗣僑補試中國學進士生暉  
暉生燦字明夫繼家學時群從昆弟為諸經講師學問文章槩  
範鄉邑從弟國學進士東山府君華字榮夫嘗與其族兄二教  
府君相字魏大學于雙峰饒子之門饒乃勉齋先先黃文肅公  
高第弟子二教及東山問難扣息悉得其蘊與祁邑理學之盛  
自二公發之東山早歲又嘗從學鄧陽廬趙先生介如典故

中書右丞五峰先生燕公楠為同門至元初燕公僉江浙行中書省事道過祁門訪求東山與論舊故將薦諸朝東山固辭明夫無子東山有五子稔聞家庭之學明夫夫人王氏請其第三子應新字元美為嗣是為中山處士記識博洽議論慷慨嘗著便民二十條力陳當世要務欲上之臺省不果聞者惜之處士娶同邑貢士石溪先生康鼎寔第二女生五子次四是為先生大德八年甲辰正月八日：初出先生于桃墅里第生而有異處士君謂康夫人曰吾祖考積善陰德多矣或者食報于是兒興吾宗乎甫六歲石溪教之孝經論語孟子随口成誦日記數百言後二年冬石溪謂處士君曰吾老矣不及教訓諸外孫汝第四子骨相匪凡宜擇師善教之自是先生從鄉先生學每屈其師日益月異至十歲處士君見之先生所學彌進因取東山學問于饒先生講授之書及當時問答之言與先生覲玩遂于理學淺悟乃取朱子四書自定句讀書晝夜誦讀恍然知為學之要專勤異于儔輩或達旦不寐母夫人見生先勤苦太甚謂處士君曰是兒讀書過勤脫或因是致疾不可不戒處士君呼先生諭之曰讀書以養氣為主不宜過勞先生曰某自樂此不為勞也自是讀六經諸子歷代史通鑑綱目等書悉皆成誦延祐四年丁巳先生年十有四歲是秋鄉里傳錄江浙秋試三場題目先生一見揮筆成篇鄉先生驚異曰此天才也明年戊午

郡守札羅婺源道一書院山長雩峯胡先生炳文於郡庠開堂  
試以激厲後進先生屢中郡學及堂試典庠序諸老成相頡頏  
矣至壬戌春處士君同先生往饒之浮梁拜可堂吳先生仲迂  
于州學吳先生謂諸門人曰新安汪克寬遠來從遊穎異絕倫  
勇于為學他日必有所成及以所為文印可于吳先生曰讀書  
明理蘄體諸身文章異時可不學而能也先生既得吳先生之  
訓遂篤志聖賢之學既歸葺故廬闢書齋于居室之東偏扁曰  
思復銘于齋壁以自勵焉次年吳先生講道武林勉先生充貢  
先生答以吾斯之未能信躍等謀進其何敢然至泰定丙寅春  
聞嚴陵吳先生聞其官朝陽以春秋登甲子進士第任番陽丞  
特往訪之朝陽先生聞其言喜曰子可謂真知作春秋之心法  
矣是秋邑長令聞先生至京師會試論春秋典主司不合又兼  
對策切直遂見黜于中書先生欣然南歸遂奉養之志時貢待  
制師泰曰德輔年妙而質純才優而學博賈勇秋闈即中高第  
上之春官輒不偶于主司是得之于主司數千人之中而失之  
于數千人之外天道之無常也先生歸自京師刻勵為學痛自  
修飭遂厭科舉之文慨然曰道不行于當時矣乃取聖人手筆  
之春秋博考諸說之同異得失以胡文定公之傳為主而研究  
眾說會萃成書名之曰春秋經傳附錄纂疏翰林學士虞公序  
行于世易有程朱傳義音考詩有集傳音義會通禮有經禮補

逸網目有凡例考異其餘論著未可枚舉先生于經史聖賢之  
言心融神會造詣深劇故為文畧不經意而渾融典雅其教學  
者誘掖獎勸無不成人後以經學教授宣歙間數與師山先生  
鄭公講理論學意氣相得尚書巢深先生汪公謝事家居因遣  
其孫世賢執經先生之門四方學者知先生道學之懿從遊甚  
衆先生嘗語學者曰聖賢之學以躬行踐履操存省察為先至  
于文章特其餘事鰲峰玉署諸老交欲以文章舉薦而先生篤  
志著述不以一毫利祿動其心諸從學者以先生所居山谷園  
遠稱曰環谷先生仍至元戊寅五月居室災先生夜半奉處士  
君遷于別室以居奉養備至是九年月處士君以疾卒先生哀  
毀踰禮至正壬辰蘄黃兵至先生率長幼避兵深山所有房舍  
資財為賊焚掠殆盡篋屨空先生晏如也自是連歲兵戈擾  
攘至

聖朝戡定禍亂先生始也返故廬洪武二年正月 朝廷命行  
人賫幣禮聘先生至京同翰林潛溪宋公剛修元史是年九月  
事畢

特旨一班俱留祿仕先生以老疾力辭不受乃命禮部設宴  
賜白金三十兩米段二表裏給驛而還先生抵家以洪武五年  
壬子十有一月十二日卒年六十有九先生平居嘗語二子曰  
吾歿則祔于盛村之先塋其孤遂以是年某月日葬于其所遵

治命也娶同邑聘君和溪先生程公之女勤儉以相成其家業  
程夫人生與先生同年卒于先生前十九年癸巳五月八日子  
男二人曰希曰偕女二人長適同邑李傑夫早卒次適同里謝  
子原子原卒而守節誓終其身孫男六人銚鐔銳鉞鐔鏡國英  
蚤歲從學于先生訓迪最深辱知于先生最厚敬述其梗槩于  
右俾其孤乞銘于當世之名公以圖不朽焉門人長洲縣學教  
諭歛人吳國英撰

請春秋胡傳纂疏刊行啟

劉錦文

弱水蓬萊凝睇一方之隔泰山北斗馳心千里之瞻輒憑尺素  
之恭敷布寸丹之瀆恭惟

尊先生學通經傳道貫古今明聖人筆削之書述而不作剖賢  
者異同之說展也大成惟為人之盛心立垂世之大訓無附會  
糾纏之失重文彩于奎章極根究取舍之嚴副袞褒于華族尚  
汪公澤民有序快四方之先覩續千載之不傳得雋棘闡父振飛鈴之  
捷欲傳梓本幸毋韞玉之藏倘沐允從無任感激俾麟史昭然  
義見必功有歸將鳩工條爾書成信焉可失謹此申覆尚冀兩  
融

環谷精舍募助刊書疏

切見

環谷先生所著書籍惟春秋纂疏及春秋考異刊

于闕坊綱目考異始刊于萬川任民書塾今刊于祁  
庠矣其餘如周易傳義音攷二十六卷詩傳音義會  
通三十四卷四書音證十卷俱有益後學無力刊行  
上于好義君子樂助金穀共成勝事者

伏以立言垂訓寔裨益于前修考傳釋經尤有功于後學  
伏惟

環谷先生性資明敏學問淵源蚤中省闈破天荒于前代  
晚登史館賜雲錦于

本朝理學冠于諸儒文聲揚于四海著書數百卷昭若彗盲立  
論幾萬言判然解惑頌書肆刊行之未竟而學徒鈔錄之  
尤艱第思獨力以難成惟冀衆輕而易舉欲資好善必遂  
成功謹干

學士大夫普及賢豪傑後冀捐金而勸相將繡水以鐫雕  
大書特書請著此時之芳字寡助多助他留他日之嘉名  
各戮苦心共完勝事不日良工會集千年善本流傳天壽  
斯文典山川而悠久人界景福昇子姓之聰明拱手告聞  
點頭允可謹啓

今日

日學生汪蔭芾啓稟





國家圖書館, NATIONAL CENTRAL LIBRARY, TAIWAN, R.O.C.

五世孫 文椿  
六世孫 焯 焯 燿 燿  
六世從孫 恕 祐 救 仁義 仁信  
七世從孫 杲 泮 濟  
八世從孫 璋 珙 族孫 澍 同判